

SA DINOGODOGORAE TE ZONE Sa Vinabakala

Sa dinogodogorae hie koasa guguaana e Zisu Karisito si vata dogoro nia Tamasa koe Zisu pude na vina padapadae tadina tiñitona pu kaqu ta evaņa koari na totošo mumudi pa vinabetona sa kasia popoa. Meke garunia Zisu sa Nana mateana pude vata dogoro nia koe Zone. Zone si keke koari ka manege rua apositolo^d. Sa dinogodogorae sapu kamo koa sa si ta kubere pa totošo sipu ta ñoñovala sari na tie te Karisito, sina koa gua koasa dia rinaņerane koe Zisu Karisito sapu Asa mo sa Baņara, gua. Sa ñati binalabala tanisa tie kubekubere si pude va ñiņira ia sa rinaņerane tadina tie koa rina vina tatara te Tamasa, meke pude va manoti sari na tie pu tiro ia, meke pude sovuti pude koa va nabu pa rinaņerane, koari na totošo tasuna meke pa ñinovaņovala koari na dia kana.

Pa soku vasina koasa buka hie si koadia sari kaiņa puku dinogodogorae, sapu ta vala vina padapadae mae gua pa Buka Hope koana, sapu ele ta gilanađi koari na tie te Karisito koari na rane arini, ba kote lopu ta gilana tugo koari soku tie. Sari ñati binalabala koa sa buka hie si guahe: (1) Koadia sari na ñiniraņira kaleadi pu kanai sari na tie te Tamasa pa kasia popoa, gina kote koa ta sigiti meke mate si kaiņa. (2) Zisu si na Baņara, meke kaqu va kilasi Sa sari doduru pu kana ia sa Tamasa meke kaqu koa

mataqara si Asa koa rini. (3) Sa Tamasa si kaqu pia valeani sari doduru tie Tanisa pu koa va nabu pa rinañerane, gua tugo sarini pu tava mate pa dia rinañerane koa Sa.

Be vea votivotikaedi gua sari na binalabala na vivinei koasa vina bakalana sa buka hie, ba sa nati binalabala si bakala: sapu pa korapana Karisito sa Banara, si kaqu va kilasa va ineti Tamasa sari doduru Nana kana, kamo koe Setani, meke kaqu ta pia nia, na tamanae nia ri Nana tie raneraneedi sa Manauru vaqura, meke sa kasia popoa vaqura, pana hokoto sa minataqara hie.

Sari na Nati Pinaqapaqahana sa Buka Hie

Sa vina bakala meke sa zinama tataru kekenu.

Hinia 1:1-8

Sa pinodalaena sa dinogodogorae. Hinia 1:9-20

Sari na leta la koari ka zuapa ekelesia. Hinia 2:1 kamo hinia 3:22

Sa vinahesi koe Tamasa meke sa Lami pa Manauru. Hinia 4:1 kamo hinia 5:14

Sari ka zuapa tinokotokoro. Hinia 6:1 kamo hinia 8:1

Sari ka zuapa ivivu. Hinia 8:2 kamo hinia 11:19

Sa vinaripera koari na niniranira kaleadi meke sa ekelesia. Hinia 12:1 kamo hinia 14:5

Sari na dinogodogorae tanisa vinakilasa mumudi. Hinia 14:6-20

Sari ka zuapa sisiovona tinañaziri te Tamasa. Hinia 15:1 kamo hinia 16:21

Sa tinahuara tanisa popoa Babiloni. Hinia 17:1 kamo hinia 19:5

Sa minataqara koa holana. Hinia 19:6 kamo hinia 20:15

Sa Manauru vaqura, sa kasia popoa vaqura, meke sa Zerusalem vaqura. Hinia 21:1

kamo hinia 22:5
Sa vinabetona sa vivinei. Hinia 22:6-21

Zinama Tuketukele

¹ Hie sa dinogodogorae pa guguana e Zisu Karisito, sapu e Tamasa si vata dogoro nia koe Zisu koari na tinitona pu lopu sana kaqu ta evana. Tozi vura ni Zisu koari Nana nabulu, toso garunia Sa sa Nana mateana, pude vata gilana ni koe Zone.

² Ke tozi vura ni e Zone sari doduru gua pu ele dogori sa. Meke hiera gua si tozi Zone koasa guguana sa inavoso sapu mae guana koe Tamasa, sapu ele tava sosode va hinokara koe Zisu Karisito.

³ Tamanae si arini pu tiroi, na avosi sari na zinama kinorokorotae hire, meke va tabei saripu ta kubere vasina! Ura na ele tata mae sa toso, sapu kaqu tava gorevura sari doduru gua pu tozi vura ni Sa hire.

Sari na Zinama te Zone koari ka Zuapa Ekelesia

⁴ Arau Zone si kubere atu koa gamu ka zuapa ekelesia pa popoa Esia:*

Mani koa koa gamu sa tataru variharupi meke sa binule pu mae guadi koe Tamasa, meke koari ka zuapa Maqomaqo pa kenuna sa Nana habohabotwana Banara. Asa sa Tamasa sapu koa pukerane, meke korapa koa kamahire, meke sapu kaqu mae.

⁵ Meke mae guadi tugo koe Zisu Karisito, sa tie va sosode ta ranena. Asa sa tie sapu turu pule va

* 1:4 Ekd 3:14; Rev 4:5

kenue pa minate, meke sa Baṇara tadi na baṇara pa popoa pepeso. Meke tataruni gita, na vata rupaha gita Sa koari nada sinea pa eharana soti.*

⁶ Meke vata evaṇaeni gita Nana butubutu hiamā Sa, pude nabulu nia sa Nana Tamasa, sa Tamana. Mani koa koe Zisu Karisito sa vinahesi, meke sa ṇiniraṇira ninae rane ka rane! Emeni.*

⁷ Dotu, korapa mae pa lei si Asa! Meke kaqu dogoro sotia ri doduru tie si Asa, meke arini tugo pu huma ia si Asa. Meke kaqu kabo na talotaṇa sisigiti nia ri doduru tinoni pa popoa pepeso si Asa. Ke mani ta evaṇa tugo sapu gua asa! Emeni.*

⁸ Meke zama sa Baṇara, “Arau tugo sa kekenu* meke sa mumudi, sa Tamasa pu tagoi sari doduru ṇiniraṇira, sapu koa pukerane, meke korapa koa kamahire, meke sapu kaqu mae,” gua.*

Sa Dinogodogorae pa Guguana Karisito

⁹ Arau si e Zone, sa tasimia pa rinaṇerane meke na turaṇamia pa tinasigiti, meke sapu koa va nabu somanae koa gamu pa Binaṇara te Tamasa, meke pa tinoa keke koe Zisu Karisito. Na tie ta pusiṇu si rau, ke ta veko pa nusa Patimosi, sina tozi vura nia rau sa zinama te Tamasa, sapu sa inavosona sa guguana e Zisu Karisito.

* **1:5** Ais 55:4; Sam 89:27 * **1:6** Ekd 19:6; Rev 5:10 * **1:7** Dan 7:13; Mt 24:30; Mk 13:26; Lk 21:27; 1 Tes 4:17; Zak 12:10; Zn 19:34,37 * **1:8** Sa zinama Quriki “Alpha meke Omega” ginuana si na “kekenu meke sa mumudi.” * **1:8** Rev 22:13; Ekd 3:14

¹⁰ Koasa rane tanisa Baṅara, sipu korapa koa pa niniraṅira tanisa Maḡomaḡo Hope si rau, si avosia rau si keke mamalaini sapu zama va ululae pa mudiqu, guana buki.

¹¹ Meke zama guahe si Asa: “Mu kubere gore ni pa buka saripu dogori goi, mamu garunu lani koari ka zuapa ekelesia pu koadi pa pinaḡaha popoa Esia: pa Episasi, pa Simaena, pa Peḡa-mamu, pa Taeatira, pa Sadisi, pa Piladelapia, meke pa Laodisia,” gua.

¹² Ke linana si rau pude dogoria sapu esei beka si korapa zama mae koa rau, gua. Meke dogori rau sari ka zuapa tuturuana zuke qolo.*

¹³ Meke koa nana pa varikorapadi ri ka zuapa tuturuana zuke, si keke sapu doṅo guana keke tuna na tie, sapu poko gele doduru gore kamo pa nenena, meke na dikuru qolo si Asa pa raḡaraḡana Sa.*

¹⁴ Meke sa batuna meke sari na kaluna si keoro sisigiti, guana vulu babe na sinou, meke sari na matana si guana huruṅu nika.*

¹⁵ Meke sari na nenena si guana boronizi pu nedala sisigiti. Meke sa mamalainina Sa si guana ovaṅadi ri na tovovo vari tomotomoidi.*

¹⁶ Meke taṅini Sa pa kali lima mataona sari ka zuapa pinopino, meke vura mae pa nuzuna Sa sa magu varipera sapu ṅaru varikali, meke sa isumatana si nedala guana rimata pana korapa rane.

¹⁷ Meke sipu dogoria tugo rau si Asa, si

* **1:12** Ekd 28:4, 29:5 * **1:13** Dan 7:13, 10:5 * **1:14** Dan 7:9, 10:6 * **1:15** Izk 1:24, 43:2

matagutu sisigiti si rau, ke hoqa gore pa nena guana tie matequ. Meke va opo nau lima mataona Sa si rau, meke zama: “Mu lopu matagutu! Arau mo sa kekenu meke sa mumudi.*

¹⁸ Dotu, Arau mo si Asa sapu toana! Ele mate tu si Rau, ba kamahire si toa hola ninae rane ka rane si Arau. Tagoa Rau doduruna sa niniraṅira, hola nia sa minate, meke sarini pu koa pa popoa tadi na tie matedi.

¹⁹ Ego, mu kuberi sari na tinitoṅa pu dogori goi, saripu ta evaṅa kamahire, meke saripu kote ta evaṅa vugo repere.

²⁰ Hie sa ginugua tomena tadi ka zuapa pinopino, saripu dogori goi pa kali lima mataoqu, meke sari ka zuapa tuturuana zuke qolo. Sari ka zuapa pinopino, si sari ka zuapa mateana tadi ka zuapa ekelesia, meke sari ka zuapa tuturuana zuke si sari ka zuapa ekelesia.

2

Sa Inavoso La koa Rini pa Episasi

¹ Mamu kubere la guahe koasa mateana tanisa ekelesia pa Episasi:

Hire tugo sari na zinama tanisa pu tanini pa kali lima mataona sari ka zuapa pinopino, meke ene pa vari korapadi ri ka zuapa tuturuana zuke qolo:

² Gilania Rau sa mia tinavete, sapu tavetavete nalinali si gamu pa mia ninabulu pa korapa tinasuna, meke soto va nabu si gamu pa rinaṅerane,

* **1:17** Ais 44:6, 48:12; Rev 2:8, 22:13

meke etuli gamu sari na tie kaleadi, meke ele podeki gamu saripu poza puleni apositolo^d, meke va sosodei gamu sapu kokohadi si arini.

³ Ele turu va nabu si gamu pa rinañerane, meke pa mia tinavete ninabulu pa korapa tinasuna koasa guguaqu Rau, meke lopu hite luara pania gamu sa rinañerane.

⁴ Ba hiera mo sapu lopu qetu nia Rau koa gamu: Lopu tataru nau gamu si Rau, gua sapu tatasana.

⁵ Mi balabala ia sa mia tataru tatasana meke kamahire meke vea ululu gua sa hinoqa gore tamugamu asa. Mi kekere koari na mia sinea, mamu taveti sari na tinavete gua sapu taveti gamu tatasana. Ba be lopu kekere pule gamu, si kote atu kamo koa gamu si Rau, meke vagi pania sa mia tuturuana zuke pa nana vasina.

⁶ Ba hie sapu qetu nia Rau koa gamu, sapu kukiti ni gamu sari na tinavete tadi na puku tie pu ta pozae Nikolesiani, sari tinavete sapu Arau ba kukiti ni.

⁷ Asa sapu ari taliñana si mani avosia gua sapu zama nia sa Maqomaqo Hope koari na ekelesia!* Koarini pu turu va nabu pa dia rinañerane koa Rau osolae kamo sa vinabetona, si kaqu va malumi Rau pude hena ia sa vuana sa huda tinoa, sapu toqolo pa korapa inuma tolavaena te Tamasa.

Sa Inavoso La koarini pa Simaena

⁸ Mamu kubere la guahe koasa mateana tanisa ekelesia pa Simaena:*

* **2:7** Zen 2:9; Rev 22:2; Izk 28:13, 31:8
Rev 1:17, 22:13

* **2:8** Ais 44:6, 48:12;

Hire sari na zinama tanisa Kekenu meke sa Mumudi, sapu ele mate ba toa pule.

⁹ Gilania Rau sapu ta nonovala si gamu, meke sapu koa malana si gamu; ba tagotago hola tugo si gamu pa tinoa Maqomaqo! Gilania Rau sapu zama nonovala gamu arini pu poza puleni tie Ziu, ba namu kari hokara tu, sina na puku vinarigara mo pa sinaqoqi^d te Setani si arini.

¹⁰ Mi lopu matagutu nia sa tinasuna sapu lopu sana kote atu raza koa gamu. Tozini gamu Rau sapu kaiqa gamu si kote vala ni gamu sa Devolo* pa vetu varipusi pude podeke gamu, meke ka manege puta rane si kote koa ta sigiti si gamu. Ke mi turu va nabu pa rinanerane osolae kamo sa minate, meke kaqu poni gamu Rau sa tinoa hola sapu guana pinia.

¹¹ Asa sapu ari talinana si mani avosia gua sapu zama nia sa Maqomaqo Hope koari na ekelesia!* Arini pu turu va nabu pa dia rinanerane koa Rau osolae kamo sa vinabetona, si lopu kaqu ta vala koasa vina kilasa koa holana koa sa minate vina rua.

Sa Inavoso La koa Rini pa Peqamamu

¹² Mamu kubere la guahe koasa mateana tanisa ekelesia pa Peqamamu:

Hire sari na zinama tanisa pu tagoa sa magu varipera sapu naru varikali.

¹³ Gilania Rau vasina koa si gamu. Asa sa vasina sapu koa sa habohabotuana meke koa banara se Setani. Ba turu va nabu mia tu si

* **2:10** Sa Devolo si keke pozana e Setani. * **2:11** Rev 20:14, 21:8

gamu, meke lopu hite oso nia gamu sa mia rinañerane koa Rau, gua tugo pa tooso sapu tava mate se Anitipasi. Lopu hite makudo tozi vura nia sa sa guguaqu Rau koari na tie.

¹⁴ Ba ka visavisa ginugua mo hire si lopu qetu ni Rau koa gamu. Koadia koa gamu sari kaiqa tie pu lulia sa vina tumatumae te Belami^d, sapu va tumatumae nia sa koe Balaki, pude turana va sea i sari na tie Izireli, pude henai sari na ginani sapu ele tava vukivukihi la koari na beku, meke pude evania sa vinari riqihi.*

¹⁵ Meke gua tugo, sapu koadia sari kaiqa tie pa korapa mia gamu, pu lulia sa vina tumatumae tadi na puku tie pu ta pozae Nikolesiani.

¹⁶ Ego, mi kekere koari na mia sinea! Be lopu gua, si kote lopu sana atu raza ni gamu magu varipera Rau sapu vurana mae pa nuzuqu Rau.

¹⁷ Asa sapu ari talinana si mani avosia gua sapu zama nia sa Maqomaqo Hope koari na ekelesia! Koarini pu turu va nabu pa dia rinañerane osolae kamoā sa vinabetona, si kaqu poni ni mana tomena Rau si arini. Meke kaqu hopeke poni patu keoro Rau si arini, vasina ta kubere si keke pozapoza vaqura, sapu loke tie gilania, ba telena mo asa pu vagina sa.*

Sa Inavoso La koa Rini pa Taeatira

¹⁸ Mamu kubere la guahe koasa mateana tanisa ekelesia pa Taeatira:

* **2:14** Nab 22:5,7, 25:1-3, 31:16; Diut 23:4 * **2:17** Ekd 16:14-15, 16:33-34; Zn 6:48-50; Ais 62:2, 65:15

Hiera sa zinama tanisa Tuna Tamasa, sapu guana hurunu nika sari na matana, meke nedala sisigiti guana boronizi sari na nenena.

¹⁹ Gilani Rau sari na mia tinavete, na tataru, na rinañerane, meke sari na mia tinavete ninabulu, meke soto va nabu si gamu pa rinañerane pa korapa tinasuna. Gilania Rau sapu tavetavete va ninirae hola si gamu kamahire, hola nia sapu tatasana.

²⁰ Ba hiera mo sapu lopu getu nia Rau koa gamu: Ura lopu hite hukatia gamu se Zezibelo, sa barikaleqe sapu poza pule nia poropita te Tamasa, gua. Meke pa nana vina tumatumae si turana va sea i sa sari na Qua nabulu pude somana pa hahanana maqota na gua, meke pude henai sari na ginani pu ele tava vukivukihidi la koari na beku.*

²¹ Ele ponía totoso Rau si asa, pude mani luara pania sa nana hahanana varivosa, ba lopu hiva si asa.

²² Gua asa ke kote va kilasia Rau si asa pa minoho, meke sarini pu baratana si asa, si kote vata sigiti va sisigiti pani Rau si arini, be guana lopu kekere si arini koari na sinea tanisa.

²³ Meke kaqu va matei tugo Rau sari doduru koburu tanisa, pude va sosodea koari doduru ekelesia, sapu Arau mo gilana betoi sari doduru bulodia ri na tie, meke kaqu hopeke pia gamu Rau si gamu doduru, koasa padana sa mia tinavete, meke kaqu va kilasi Rau sari na mia sinea.*

* **2:20** 1 Bañ 16:31; 2 Bañ 9:22,30 * **2:23** Sam 7:9; Zer 17:10; Sam 62:12

²⁴ Ba koa gamu kaiqa Qua tie pa Taeatira pu lopu somana nia sa vina tumatumae kaleana tanisa, meke lopu ele va nonogai gamu sari na ginugua golomodi na tomedi te Setani saripu pozai rini, si lopu kote ponini gamu pule Rau si kaiqa tinarae mamatadi.

²⁵ Ba mi tuqe va nabua sapu tagoa gamu, osolae kamo sa Qua minae.

²⁶⁻²⁷ Meke arini sapu turu va nabu, meke evania sapu gua hiva nia Rau osolae kamo sa vinabetona, si kaqu poni ni niniraira Rau koari na butubutu, kekenono sapu gua vagia Rau koasa Tamaqu. Kaqu tagoi rini sari doduru niniraira pude banara ni sari na butubutu, meke kaqu va kilasi rini sari na tie, guana raro patu sapu ta bele va umumu.*

²⁸ Meke kaqu poni ni pinopino habia Rau si arini.

²⁹ Asa sapu ari taliñana si mani avosia, gua sapu zama nia sa Maqomaqo Hope koari na ekelesia!.

3

Sa Inavoso La koa Rini pa Sadisi

¹ Mamu kubere la guahe koasa mateana tanisa ekelesia pa Sadisi:

Hire tugo sari na zinama tanisa pu totoli ni sari ka zuapa Maqomaqona sa Tamasa, meke sari ka zuapa pinopino. Gilani Rau sari na mia tinavete. Balabala ia rina tie sapu toa si gamu koa Rau gua, ba lokari; namu guana tie matemias si gamu.

* **2:26-27** Sam 2:8-9

² Ke mi vaṇunu gamu, mamu va n̄inira ia sa mia tinoa maqomaqo sapu tata matena. Ura ele dogoria Rau sapu lopu gotogoto sari na mia tinavete pa dinoṇo te Tamasa.

³ Mi balabala ia sapu gua ele tava tumatumae nia, meke avosia gamu. Mi va tabea sa vina tumatumae asa, mi kekere pule koari na mia sinea. Ba be lopu vaṇunu si gamu, si kote atu golomo koa gamu si Rau, guana tie hikohiko. Meke lopu kote gilania gamu sa totošo sapu kote atu kamo si Rau.*

⁴ Ba koadia tugo koa gamu pa Sadisi sari ka visavisa tie saripu lopu ele va boni sari na dia poko koari na dia hahanana kaleadi. Ura arini tugo si kote pokopoko keoro meke ene turaṇae koa Rau, sina garo tugo si arini.

⁵ Arini pu turu va nabu pa dia rinaṇerane osolae kamo sa vinabetona, si kote poko nia sa poko keoro gua asa, meke lopu kote huara pani Rau sari na pozadia koasa buka tinoa, meke kote helahelae ni Rau pa kenuna sa Tamaqu, meke koari Nana mateana sapu arini si na tie Taqarau.*

⁶ Asa sapu ari talinana si mani avosia gua sapu zama nia sa Maqomaqo Hope koari na ekelesia.

Sa Inavoso La koa Rini pa Piladelapia

⁷ Mamu kubere la guahe koasa mateana tanisa ekelesia pa Piladelapia:*

* **3:3** Mt 24:43-44; Lk 12:39-40; Rev 16:15
Sam 69:28; Rev 20:12; Mt 10:32; Lk 12:8

* **3:5** Ekd 32:32-33;
* **3:7** Ais 22:22; Zob 12:14

Hire tugo sari na zinama tanisa pu hopena meke hinokara. Asa mo sapu tagona sa vidulu* te Devita, meke pana tukelia Sa sa sasada, si loke tie kote boka tuku pulea, meke pana tukua Sa, si loke tie kote boka tukele pulea si asa.

⁸ Gilani Rau sari na mia tinavete. Dotu, ele poni gamu Rau si keke sasada tukelena meke sapu loke tie kote boka tuku ia pude nabulu Nau. Gilania Rau sapu vasinahite mo sa mia niniranira, ba kopu ni gamu sari na Qua zinama, meke lopu hite oso nia gamu sa pozaqu Rau.

⁹ Dotu, sarini pu koa pa sinaqoqi te Setani si poza pule ni tie Ziu, gua, ba namu lokari hokara. Kaqu ososo ni Rau si arini pude atu, meke hoqa kokotuŋu pa kenumia gamu pude va lavata gamu, meke kote gilania rini sapu tataruni gamu Rau si gamu.*

¹⁰ Ele kopu va noŋo ni gamu sari na Qua tinarae pa mia sinoto koa Rau pa tinasuna, gua asa ke kaqu va sare gamu tugo Rau koasa totošo tasuna sapu kote raza mae, pude podeki saripu koa koasa kasia popoa.

¹¹ Lopu sana kaqu atu kamo si Rau. Ke mi kopu valeana nia sapu gua ele vagia gamu, pude lopu ta hukata si gamu pude vagia sa mia pinia.

¹² Ura arini pu turu va nabu pa dia rinaŋerane osolae kamo sa vinabetona, si kote va evaŋae guni Rau na dedegere koa sa Zelepade tanisa Qua Tamasa. Meke kote koa hola si arini vasina.

* **3:7** Sa ginuana sa vidulu te Devita si guahe: e Karisito si na Baŋara pa tutina e Devita koasa Binaŋara te Tamasa, meke arini pu hiva ni Sa, si va nuquru la i Sa pa Nana binaŋara. * **3:9** Ais 49:23, 60:14; Ais 43:4

Meke kote kuberia Rau koarini sa pozana sa Qua Tamasa, meke sa pozana sa vasileana nomana tanisa Qua Tamasa, sapu sa Zerusalem vaqura, sapu kote gorevura mae guana koe Tamasa pa Mañauru, meke kote kuberia tugo Rau koarini sa pozaqu vaqurana.*

¹³ Asa sapu ari taliñana, si mani avosia gua sapu zama nia sa Maqomaqo Hope koari na ekelesia.

Sa Inavoso La koa Rini pa Laodisia

¹⁴ Mamu kubere la guahe koasa mateana tanisa ekelesia pa Laodisia:*

Hire tugo sapu zama nia Sa sapu ta pozae Emeni. Sa tie va sosode ta ranena meke hinokara, Asa sa Bañara koari doduru pu ta kuri koe Tamasa.

¹⁵ Gilani Rau sari na mia tinavete. Lopu ibu, meke lopu mañini si gamu. Sa Qua hiniva si pude ibu, babe mañini si gamu,

¹⁶ ba lopu mañini meke lopu ibu si gamu, gua asa ke kote lua pani gamu Rau pa nuzuqu.

¹⁷ Zama si gamu, 'Na tie tagotago mami si gami, na soku mami likakalae; meke lopu hite ehaka nia gami si keketona,' gua. Ba namu lopu gilania tu gamu sapu guana tie malaña sisigiti, na variva taru, na habahuala, na behu meke dodoho mia si gamu.

¹⁸ Hie tugo sa Qua zinama varitokae koa gamu. Mi mae holua koa Rau sa qolo sapu tava viana pa nika, pude mi koa tagotago hinokara. Mi holua sa poko keoro mamu va sagea, pude mi va paeria

* **3:12** Rev 21:2; Ais 62:2, 65:15 * **3:14** ZT 8:22

sa kinurekurena sa mia dinodoho. Mi holui tugo kaiqa meresena mamu va honi lani pa matamia pude mi dodogorae.

¹⁹ Saripu tataru ni Rau si gegesi na va tonoti Rau. Ke mi luara pani sari na mia sinea pude soto va ninira koa Rau.*

²⁰ Dotu! Korapa turu si Rau pa sasada meke kikia, be avosia ke tie sa mamalainiqu meke tukelia sa sasada, si kote nuquru la si Rau, meke somana henahena koa sa, meke asa si kote somana henahena koa Rau.

²¹ Meke arini pu turu va nabu pa dia rinañerane osolae kamoia sa vinabetona, si kote va malumi Rau pude somana habotu koasa Qua habotuana Bañara, meke somana tagoa tugo sa ninirañira koasa Qua Binañara, gua sapu ele koa mataqara si Rau, meke somana habotu koasa habotuana Bañara tanisa Tamaqu, meke somana tagoa tugo Rau sa ninirañira koasa Nana Binañara.

²² Asa sapu ari talinana si mani avosia, gua sapu zama nia sa Maqomaqo Hope koari na ekelesia,” gua si asa.

4

Vinahesi pa Mañauru

¹ Meke sipu beto saripu gua sara, si dono la si rau, meke dogoria rau, si keke sasada ta tukelena pa Mañauru. Meke sa tie sapu avoso kekenua rau, sapu sa mamalainina si guana buki si zama: “Sage mae tani, maqu va dogoro nigo sapu gua kote ta evaņa vugo repere,” gua.

* 3:19 ZT 3:12; Hib 12:6

² Meke hinoqa koa si rau pa n̄niran̄ira tanisa Maqomaqo Hope, meke dogoria rau pa Mañauru si keke sapu korapa habotu Nana koasa n̄ati habotuana Bañara.*

³ Meke Asa sapu habotu vasina, si donodono guana patu sapu viana guana qelasi, meke ziñara guana ehara. Meke keke bigobigo sapu buma guana patu emerolo*, si vari likohae nia sa habotuana Bañara.

⁴ Meke pa vari likohaena sa n̄ati habotuana Bañara, si koadia pule sari ka hiokona made habotuana bañara. Meke habotu dia vasina sari ka hiokonā made koimata, saripu pokopoko keoro meke toropae ni dia sari na toropae bañara saripu ta tavetae qolo.

⁵ Meke vura va hodaka mae koasa n̄ati habotuana Bañara sa malarana sa kapi, meke ta avoso sa pidalana sa paka mañauru na lulusu. Meke pa kenuna sa n̄ati habotuana Bañara si koadia sari ka zuapa zuke hurunudi. Ar̄ini sari ka zuapa Maqomaqona sa Tamasa.*

⁶ Meke koa nana pa kenuna sa n̄ati habotuana Bañara si keke tiñitona, sapu dono guana kolo sapu bule sisigiti, meke kekenono gua na qelasi viana. Meke pa vari likohaena sa n̄ati habotuana Bañara asa, si koadia sari ka made kurukuru toadi, saripu tale matadi mo kenudi na mudidi.*

*

⁷ Sa kurukuru kekenu si dono guana laione,

* **4:2** Izk 1:26-28, 10:1 * **4:3** Sa patu emerolo hie si buma guana karamahi. * **4:5** Ekd 19:16; Rev 8:5, 11:19, 16:18; Izk 1:13; Rev 1:4; Zak 4:2 * **4:6** Izk 1:22 * **4:6** Izk 1:5-10, 10:14

meke sa vina rua si doño guana bulumakao kokoreo, meke sapu vina neta si doño guana tie mo sa isumatana, meke sa vina made si doño gua tugo na atata tapuruna.

⁸ Meke hopeke onomo tatapurudi sari ka made kurukuru hire, meke tale matadi mo doduru tinidi si arini, meke pa kauru tatapurudi ba gua tugo. Meke rane na boñi si lopu makudo zama guahe sa dia vinahesi:*

“Hopena, hopena, hopena sa Bañara, sa Tamasa sapu tagoi sari doduru ñinirañira, sapu koa pukerane, meke korapa koa kamahire, meke sapu kaqu mae,” gua.

⁹ Meke doduru toso vahesihesia, na va lavalavatia, meke zama leana la ia ri ka made kurukuru toadi si Asa pu habotuna koasa ñati habotuana Bañara, meke sapu toa hola ninæ rane ka rane,

¹⁰ si hoqa todoño sari ka hiokona made koimata pa kenuna Sa, pu habotu koasa ñati habotuana Bañara, meke vahesia rini si Asa, sapu toa hola ninæ rane ka rane. Meke pa vinahesi si veko lani rini pa kenuna sa ñati habotuana Bañara sari na dia toropae bañara, meke zama:

¹¹ “Ke Tamasa mami Bañara, garomu tugo pude vagia Goi sa vinahesi, na vina lavata meke na ñinirañira.

Ura Agoi mo kuri sari doduru likakalae, meke pa Mua hiniva mo Goi si koa meke toa si arini,” gua.

* 4:8 Izk 1:18, 6:2-3, 10:12

5

Sa Kinubekubere Ta Viqusuna meke sa Lami

¹ Meke dogoria rau si keke pepa ta viqusuna pa kali lima mataona si Asa pu habotu koasa habotuana Baṇara. Sa pepa si koa betoi na kinubekubere pa karu kalina, meke ka zuapa tokoro si tuku va nabua. ² Meke dogoria rau si keke mateana niṇirana, sapu velavela va ululae guahe: “Esei si garona pude va maluari sari na tokoro koa sa, meke repahia sa pepa ta viqusuna?” gua.

³ Ba namu loke tie pa Maṇauru babe pa pepeso babe pa kauruna sa pepeso si garo pude va maluari, meke tiro ia si asa.

⁴ Ke kabo lamo si rau, sina loke tie hokara si ta dogoro, sapu garona pude tukelia meke tiro ia sa kinubekubere ta viqusuna asa.

⁵ Meke zama mae guahe koa rau si keke ri kasa koimata ta ronuedi: “Mu lopu kabo. Dotu, sa Laione pa butubutu te Ziuda, sapu tuti gorena mae gua koe Devita, si ele koa mataqara. Asa si garona pude va maluari sari ka zuapa tokoro, meke repahia sa pepa ta viqusuna,” gua.

⁶ Meke doṇo la si rau, meke dogoria rau si keke Lami^d, korapa turu Nana pa kokorapana sa ṇati habotuana Baṇara, meke vari likohae nia ri ka made kurukuru toadi, meke sari na koimata, si Asa. Ba sa Lami, si guana ele tava matena tu. Ka zuapa sari na kikihona meke ka zuapa matana, sapu sari ka zuapa Maqomaqona sa Tamasa, pu ta garunu la pa doduruna sa kasia popoa.*

* 5:6 Ais 53:7; Zak 4:10

⁷ Meke la vagia sa Lami sa pepa ta viqusuna pa kali lima mataona si Asa, pu habotu koasa nati habotuana Baṅara.

⁸ Meke sipu ele ade vagia sa Lami sa pepa ta viqusuna, si hoqa todoṅo sari ka made kurukuru toadi, meke sari ka hiokona made koimata pa kenuna sa Lami. Hopeke taṅini mike, na baolo qolo si arini, saripu siṅi na vina uququ ruqa humaṅa lea, sapu sari na vinaravara tadi na tie te Tamasa.*

⁹ Meke kera nia rini si keke kinera vaqurana, sapu guahe:*

“Garomu tugo Goi pude ade vagia sa pepa ta viqusuna,

meke va maluari sari na tokoro koa sa.

Ura ele tava mate si Goi,

meke koasa eharamu Goi

si holu vagi Goi sari kaiqa rina tie koari ninae butubutu, na vinekala, meke na popoa, pude na tie te Tamasa.

¹⁰ Ele vata evaṅae ni keke butubutu hiamā Goi si arini,*

pude nabulu nia sa nada Tamasa,

meke kaqu va baṅari rini sari na tie pa popoa pepeso,” gua.

¹¹ Meke doṅo la si rau, meke avosi rau sari na mamalainidi rina vuro tina mateana. Turu vari likohaē nia rini sa nati habotuana Baṅara, meke sari ka made kurukuru toadi, meke sari ka hiokona made koimata.*

¹² Meke kera va ululae guahe si arini:

* **5:8** Sam 141:2 * **5:9** Sam 33:3, 98:1; Ais 42:10 * **5:10** Ekd 19:6; Rev 1:6 * **5:11** Dan 7:10

“Sa Lami sapu ele tava mate, si garona tugo pude tava lavata,
 sina tanisa tugo sa binaṅara, sa tinago-
 tago, sa tinumatumae, sa niniraṅira, sa
 tinolava, sa vina lavata, meke sa vinahe-
 esi!” gua.

¹³ Beto asa si avosi rau mamalainidi sari doduru vina podaka pa Maṅauru na pepeso, meke pa kauruna sa pepeso, meke pa kōlo, meke sari doduru pu koa pa doduru vasina, saripu kera guahe:

“Mani koa koa Sa pu habotu koa sa ṅati habotua Baṅara meke sa Lami,
 sa vinahesi, sa vina lavata, sa tinolava, sa niniraṅira ninae rane ka rane!” gua.

¹⁴ Meke olaṅa sari ka made kurukuru toadi, “Emeni!” Meke hoṅa todoṅo sari ka hiokona made koimata ta ronuedi, meke vahesia si Asa.

6

Sari na Tokorona sa Pepa Ta Viquisuna

¹ Meke sipu va maluaria sa Lami sa tokoro vina keke, si doṅo la si rau. Beto asa si avosia rau si keke ri ka made kurukuru toadi sapu velavela va ululae guana paka maṅauru, meke zama: “Vura mae,” gua.

² Meke doṅo la si rau meke dogoria rau si keke hose keoro. Meke koi nana koasa si keke tie pu taṅinia nana si keke bokala, meke ta vala koasa si keke toropae baṅara. Meke vura taloa si asa, guana tie varane sapu koa va mataqara pa vinaripera.*

* 6:2 Zak 1:8, 6:3,6

³ Meke sipu va maluaria sa Lami sa tokoro vina rua, si avosia rau sa kurukuru toana vina rua sapu zama: “Vura mae!” gua.

⁴ Meke vura mae gana si keke hose ziñara. Meke ta vala koasa tie pu koi pa hose sa niniranira pude vagi pania sa binule koasa popoa pepeso, pude di variva matematei gedi sari na tie. Meke ta vala koasa si keke magu varipera lavata, meke taluarae la si asa.*

⁵ Meke sipu va maluaria sa Lami sa tokoro vina neta, si avosia rau sa kurukuru toana vina neta sapu zama: “Vura mae!” gua. Ke doño la si rau, meke dogoria rau si keke hose mumuhu; sa tie sapu koi koasa si tañinia nana pa limana si keke sikele.*

⁶ Meke avosia rau si keke mamalaini sapu mae pa vari korapadia ri ka made kurukuru toadi, sapu zama: “Sage hola sa hinolu ginani, keke kilo palava huiti mo si padana sa tinabara pa keke rane, meke gua tugo sa tinabara koari ka neta kilo palava bale. Ba mu lopu noñovalia sa oela meke sa vaeni sapu koa pa inuma!” gua.

⁷ Meke sipu va maluaria sa Lami sa tokoro vina made, si avosia rau sa kurukuru toana vina made, sapu zama: “Vura mae!” gua.

⁸ Meke doño la si rau, meke dogoria rau si keke hose sapu doño guana tata matena. Meke sa pozana sa tie sapu koi koasa si na Minate, meke luli tata pa mudina si keke sapu ta pozae, popoa tadi na tie matedi. Meke ta vala koarini sa niniranira pude di va matea si keke koari ka made pinaqahana sa butubutu tie pa kasia

* 6:4 Zak 1:8, 6:2 * 6:5 Zak 6:2,6

popoa koasa varipera, na so_ue, na oza, meke na kurukuru pinomodi, gua.*

⁹ Meke sipu va maluaria sa Lami sa tokoro vina lima, si dogori rau pa kauruna sa hope sari na maqomaqodi rina tie pu tava mate, sina tozi vura nia rini sa zinama te Tamasa, meke helahelae nia rini sa dia rina_uerane koe Zisu.

¹⁰ Meke velavela va ululae guahe si arini: “Ke Ba_unara, Agoi pu tagoi sari doduru ninira_unira; hopemu meke hinokara si Goi! Ve seunae gua meke kote va kilasi Goi sari na tie pa kasia popoa, saripu va mate gami si gami, pude hobei sari na ehara mami?” gua.

¹¹ Meke hopeke ta poni poko gele doduru sapu keoro si arini, meke ta tozi nia rini si pude aqa va no_uno si arini, osolae kote tava mate beto sari na nabulu tura_unadia, na tasidia koe Karisito saripu vizati sa Tamasa pude tava mate gua puta tugo arini, gua.

¹² Meke korapa dono la si rau sipu va maluaria sa Lami sa tokoro vina onomo, si kamo si keke niu ninira_una hola pa popoa pepeso, meke ta ilirae muho sa rimata, meke ta ilirae zinara guana ehara sa sidara.*

¹³ Meke hoqa gore pa pepeso sari na pinopino pa ma_uauru, guana vua piqi^d kubolodi, saripu nolo to_uoso hiru goren_u na givusu niburu.*

¹⁴ Podalae pa keke kalina, meke kamo pa keke kalina si hola taloa sa ma_uauru guana pepa sapu

* **6:8** Izk 14:21 * **6:12** Rev 11:13, 16:18; Ais 13:10; Zol 2:10,31, 3:15; Mt 24:29; Mk 13:24-25; Lk 21:25 * **6:13** Ais 34:4

ta viqusuna, meke sari doduru toqere na nunusa si tava rizu pa dia kokoana.*

¹⁵ Beto asa si govete meke koa tome pa bae, na qoqoro patu koari na toqere sari na banarana sa popoa pepeso, na tie arilaedi, na tie tagotagodi, na tie pu tago niniranira, meke sari doduru pinausu, meke saripu lopu na pinausu.*

¹⁶ Meke zama la i rini sari na patu: “Mi hoqa mae koa gami,” meke koari na toqere, “Mi va paere gami koa Sa pu habotu pa nati habotuana Banara, meke koasa tinaaziri na vina kilasa tanisa Lami!”*

¹⁷ Ura ele kamo mo he sa rane kaleana tanisa dia binugoro. Meke namu loke tie si kote boka govete nia sa vina kilasa sana,” gua sarini.*

7

Sari ka Keke Gogoto Made Navulu Made Tina Tinoni pa Butubutu Izireli

¹ Beto asa, si dogori rau sari ka made mateana, korapa turu dia koari ka made iiona sa kasia popoa, meke va bulei rini sari ka made givusu, pude lopu givusu la pa pepeso, pa lamana, babe koari na huda.*

² Beto asa si dogoria rau si keke mateana, sapu mae guana pa kali gasa rimata. Palekia sa sa tokoro sapu sa vina gilagila tanisa Tamasa toana, meke velavela va ululae la si asa koari ka made mateana, sarini pu ta poni niniranira pude va kaleania sa pepeso, meke sa lamana.

* **6:14** Rev 16:20 * **6:15** Ais 2:19, 21 * **6:16** Hoz 10:8; Lk 23:30 * **6:17** Zol 2:11; Mal 3:2 * **7:1** Zer 49:36; Dan 7:2; Zak 6:5

³ Meke zama sa mateana: “Mi lopu va kaleania sa pepeso, meke sa lamana, meke sari na huda, osolae ta tokoro paki nia tu rina nabulu pa raedi sa vina gilagila tanisa nada Tamasa,” gua.*

⁴ Meke avosia rau sa ninaedi ri pu ta tokoro nia sa vina gilagila te Tamasa pa raedi, sapu ari ka keke gogoto made navulu made tina tie, saripu mae guadi koari ka manege rua butubutu Izireli.

⁵⁻⁸ Meke hire sari ka manege rua butubutu Izireli, koa ri kasa arini, vasina mae guadi sari hopeke manege rua tina: Ziuda, Rubeni, Qadi, Asa, Napitalai, Manase, Simione, Livae, Isaka, Zeboloni, Zosepa meke Benisimane.

Sa Vinarigara Lavata

⁹ Beto asa si dono la si rau, meke dogoria rau si keke vinarigara lavata, sapu lopu boka ta nae. Mae guadi koari doduru hopehopeke butubutu, na popoa, meke pa ninae vinekala, meke turu dia pa kenuna sa nati habotuana Banara, meke pa kenuna sa Lami. Pokopoko keoro gele doduru si arini, meke tanini dia pa limadi sari na kava huda pamu, pude va lavatia si Asa.

¹⁰ Meke velavela va ululae guahe si arini: “Sa Tinaharupu si mae guana koasa nada Tamasa, sapu habotu koasa nati habotuana Banara, meke mae guana koasa Lami!” gua.

¹¹ Meke turu vari likohae nia ri doduru mateana, na koimata ta ronuedi, meke sari ka made kurukuru toadi sa nati habotuana Banara,

* 7:3 Izk 9:4,6

meke hoqa todono pa kenuna sa nati habotua-
ana Baṅara sari doduru, meke vahesia rini sa
Tamasa.

¹² Meke zama guahe si arini: “Uve, sa vīnahesi,
sa tinovala, sa tinumatumae, sa zinama leana, sa
vina lavata, sa niniraṅira, si tanisa nada Tamasa
tugo ninae rane ka rane. Emeni!”

¹³ Beto asa si keke rina koimata ta ronuedi si
nanasa guahe koa rau: “Ari sei sari kasa sapu
pokopoko keoro hire, meke pavei mae guadi
sari?” gua.

¹⁴ Meke olaṅa la ia rau si asa: “Baṅara, agoi
tu gilania. Arau lopu gilania.”* Meke zama
mae au sa, “Hire sari na tie pu koadi pa korapa
ninovanovala kaleana hola meke vura mae. E
le va via i rini sari na dia poko gele doduru pude
tava keoro, pa eharana sa Lami.

¹⁵ Gua asa ke turu pa kenuna sa nati habotua-
ana Baṅara te Tamasa si arini, meke nabulu nia
si Asa rane na boṅi pa Nana Zelepade. Meke kote
koa turani Sa si arini meke va aqori na kopu ni
Sa.

¹⁶ Lopu kaqu ovia pule si arini, lopu kaqu
memeha pule. Lopu kaqu nada i na rimata, babe
ta sigiti nia sa maṅini.*

¹⁷ Ura sa Lami sapu koa pa kokorapana sa
nati habotuaana Baṅara, si kaqu kopu ni si arini,
guana dia sepati. Meke kote turana lani Sa si
arini koari na bukahana sa kolo tinoa, meke lopu
kote kabo na talotaṅa si arini.”*

* **7:14** Dan 12:1; Mt 24:21; Mk 13:19 * **7:16** Ais 49:10 * **7:17**
Sam 23:1; Izk 34:23; Sam 23:2; Ais 49:10; Ais 25:8

8

Sa Tokoro Vina Zuapa

¹ Meke sipu va maluaria sa Lami sa tokoro vina zuapa si lopu hite kulu va kale sa Mañauru pa kukuru aoa.

² Meke dogori rau sari ka zuapa mateana saripu turu dia pa kenuna sa Tamasa, meke ta poni ni rini sari ka zuapa buki.

³ Meke keke mateana pule si mae, meke turu kapae nana pa hope tanisa vina uququ. Meke tañinia nana si keke vovoina qolo vasina tava uqu sa vina uququ ruqa humaña lea. Meke soku sari na vina uququ saripu ta poni ni sa, pude tomo lani koari na vinaravara tadi doduru tie te Tamasa koasa hope qolo, sapu koa pa kenuna sa nati habotuana Bañara.*

⁴ Meke sa tunahana sa vina uququ meke sari na vinaravara tadi na tie te Tamasa, si vura mae gua pa vovoina qolo pa limana sa mateana, meke sage la pa kenuna sa Tamasa.

⁵ Meke paleke la nia sa mateana sa vovoina vina uququ, meke va sini nia nika sa koasa hope, meke gona gore la nia sa sa nika pa popoa pepeso, ke malara va hodaka sari na kapi, meke pidala na lulusu sari na paka mañauru, meke niu sa popoa pepeso.*

Sari na Buki

⁶ Meke va namanama ivui ri ka zuapa mateana sari na buki pu tañini rini pa limadia.

* **8:3** Em 9:1; Ekd 30:1,3 * **8:5** Liv 16:12; Izk 10:2; Ekd 19:16; Rev 11:19, 16:18

⁷ Meke sipu ivua sa mateana kekenu sa nana buki, si hoqa gore mae pa pepeso sari na kabukabue aesi, meke na nika sapu varihenie ehara. Meke ta sulu palae beto si keke koari ka neta pinaqahana sa popoa pepeso, meke keke koari ka neta pinaqahadi rina hudahuda, meke sari doduru duduli buma pa popoa pepeso ba ta sulu palae.*

⁸ Beto asa si ivua sa mateana vina rua sa nana buki, meke ta oki gore la pa lamana si keke sapu dono guana keke toqere suluna sapu nomana hola. Meke ta ilirae ehara si keke koari ka neta pinaqahana sa lamana.

⁹ Meke keke koari ka neta pinaqahadi ri doduru tinitoṅa toadi pa lamana si mate, meke keke koari ka neta pinaqahadi rina vaka si ta huara.

¹⁰ Beto asa si ivua sa mateana vina neta sa nana buki, meke hoqa gore mae guana pa maṅauru si keke pinopino lavata sapu huruṅu guana zuke. Meke hoqa la ia si keke koari ka neta pinaqahadi rina ovuku, na leana, meke sari na bukaha.*

¹¹ Meke sa pozana sa pinopino hie, si e “Pasa.” Meke ta ilirae pasa si keke koari ka neta pinaqahana sa kolo, meke soku tie si mate nia, sina napoa rini sa kolo pasana hie.*

¹² Beto asa si ivua sa mateana vina made sa nana buki, meke tava huporo si keke koari ka neta pinaqahana sa rimata, na sidara, meke sari na pinopino. Meke keke koari ka neta pinaqahana sa rane si lopu rimata, meke keke koari ka

* **8:7** Ekd 9:23-25; Izk 38:22 * **8:10** Ais 14:12 * **8:11** Zer 9:15

neta pinaqahana sa boni si loke ruqaha, meke keke koari ka neta pinaqaha si lopu kalalasa sari na pinopino.*

¹³ Meke sipu dono la rau, si avosia rau si keke atata, sapu tetedoro nana panaulu hola pa galegalearane, sapu velavela va ululae guahe: “Madi talotana hola gedi si arini pu koa ia sa popoa pepeso, pana ta avoso sari na buki saripu kote ta ivu koari ka neta mateana pule,” gua si asa.

9

¹ Meke ivua sa mateana vina lima sa nana buki, meke dogoria rau si keke pinopino sapu ele hoqa gore mae pa pepeso, meke ta poni nia sa sa viduluna sa pou loke kokoina.

² Meke tukelia sa pinopino sa pou asa, meke vura sage mae pa pou sa tunaha muho, guana tunahana keke nika nomana, meke tava huporo sa kalalasanya sa rimata, meke sa galegalearane koasa tunaha sapu vura mae pa pou.*

³ Meke vura mae pa korapa tunaha sari na kupokupo, meke gore mae hake si arini pa pepeso, meke ta poni nia rini sa niniranira pude va hereria sa tie, kekenono gua sa hinerere tanisa nenege.*

⁴ Meke ta tozi nia rini si pude lopu nonovali sari na duduli, na huda, babe sari na linetelete; ba novali mo sari na tie pu lopu ta veko pa raedia sa tokoro vina gilagila te Tamasa, gua.*

* **8:12** Ais 13:10; Izk 32:7; Zol 2:10,31, 3:15 * **9:2** Zen 19:28

* **9:3** Ekd 10:12-15 * **9:4** Izk 9:4

⁵ Tava malumu si arini pude va sigiti sari na tie koari ka lima sidara, ba lopu tava malumu koarini si pude va matei sari na tie, ba pude vata sigiti guni mo na ginarata tana nenege, gua.

⁶ Meke koari ka lima sidara sara, si kote hata ia rini sa minate, ba lopu kote kamoā rini si asa. Kote hiva mate hola si arini, ba lopu kaqu boka.*

⁷ Doṅo kekeṅoṅo gua tugo rina hose pu tava namanama pude la pa vinaripera sari na kupokupo. Koari na batudi si koa nana si keketona sapu doṅo guana toropae qolo tana baṅara, meke sari isumata dia si gua tugo na isumata tie.*

⁸ Sari na kaludi si gele, meke sari livodi si gua tugo na livo laione.*

⁹ Meke sari na kapu raqaraqadi si gua tugo na aeana, meke sari na buruṅudi ri na tatapurudi si gua tugo na ovaṅadi ri na totopili, na hose pu haqala la pa vinaripera.*

¹⁰ Koa i pikutudi si arini, sapu guana pikutu nenege sapu vari suni, meke sari na pikutudi rini si koa i niniraṅira, pu va sigiti sari na tie soku totoṣo koari ka lima sidara.

¹¹ Meke koa nana tugo sa dia baṅara, sapu sa mateana tana pou loke kokoina hie. Sa pozana sa pa zinama Hiburu si e Abadoni, ba pa zinama Quriki si e Apolioni. Ginuana sa si “Na Tie Huhuara.”

¹² Sa tinalotaṅa kaleana kekenu si ele hola, ba pa mudina asa si kote luli mae pule si karua tinalotaṅa.

* 9:6 Zob 3:21; Zer 8:3 * 9:7 Zol 2:4 * 9:8 Zol 1:6 * 9:9 Zol 2:5

13 Meke ivua sa mateana vina onomo sa nana buki, meke avosia rau si keke mamalaini sapu mae guana koari ka made iiona sa hope qolo, sapu koa pa kenuna sa Tamasa.*

14 Meke zama la si asa koasa mateana vina onomo pu tañinina sa buki: “Mu vata rupahi sari ka made mateana pu ele ta pusidi pa ovuku lavata, sapu ta pozae Iuparetisi!” gua.

15 Meke ta rupaha sari ka made mateana saripu ele tava nama veko koasa aoa, na rane, na sidara, meke na vuaheni tanisa totošo ta mutina, pude va matei rini si keke koari ka ñeta pinaqahadi rina tie pa kasia popoa.

16 Meke avosia rau sa ninaedi rini pu koi pa hose, si ari ka karua gogoto vuro*.

17 Meke guahe sa qua dinogodogorae koari na hose, meke sari na tie pu koidi rini: Sari na dia poko raqaraqā si ziñara guana nika, meke buma guana lamana peava, meke meava. Meke doño gua tugo na batu laione sari na batudi rina hose. Meke vura pa ñuzudi rini sari na nika, na tunaha, meke na nai.

18 Meke hire sari ka ñeta oza saripu va matea si keke koari ka ñeta pinaqahadi rina tie pa kasia popoa: sa nika, sa tunaha, meke sa nai, sapu vura mae pa ñuzudi ri na hose.

19 Meke koai na niniranira ñuzudi na pikutudi sari na hose. Ura sari na pikutudi rini si ari batudi guana noki, pude va sigiti sari na tie.

20 Ba sari na tinoni pu lopu tava mate koari na oza sara, si lopu veko pani rini sari na dia

* 9:13 Ekd 30:1-3 * 9:16 200,000,000:

tinavete kaleadi pa limadia, meke lopu makudo vahesi rini sari na tomate kaleadi, babe sari na beku qolo, na siliva, na boronizi, na patu, na huda, saripu lopu boka dodogorae, na avavosae, babe ene.*

²¹ Meke lopu veko pani tugo rini sari na dia vinakuvakutae, na vinarivosa, na vinari riqihi, na binarabarata, na va mate tie, meke hikohiko, na gua.

10

Sa Mateana meke sa Pepa Ta Viqusuna Hitekena

¹ Beto asa si dogoria rau si keke mateana n̄inirana pule, sapu pokopoko nia na lei, meke gore mae gua pa Mañauru. Meke koa nana pa kali sage batuna si keke bigobigo, meke n̄edala guana rimata sa isumatana, meke sari nenena si guana nika hurun̄udi.

² Meke tañinia nana pa limana si keke pepa ta viqusuna hitekena, sapu ta repahana pa limana. Meke sa kali nene mataona si turu nia sa pa lamana, meke sa nene gedena si pa pepeso.

³ Meke velavela va ululae si asa, gua tugo na kurumu laione. Meke sipu beto velavela sa, si ta avoso mo sari ka zuapa paka mañauru.

⁴ Meke sipu beto tugo sa mamalain̄idi ri ka zuapa paka mañauru, si hiva kuberi rau sari na dia zinama; ba avosia rau si keke mamalain̄i sapu mae guana pa mañauru, sapu zama mae guahe: “Mu lopu tozi vura ni saripu gua zama ni

* **9:20** Sam 115:4-7, 135:15-17; Dan 5:23

ri ka zuapa paka mañauru. Madi lopu ta kubere si arini,” gua si asa.

⁵ Beto asa, si dogoria rau sa mateana sapu turuna pa lamana meke pa pepeso. Huhuku sage la nia sa pa mañauru sa kali lima mataona.*

⁶ Meke va tatara si asa pa korapa pozana sa Tamasa toa hola ninae rane ka rane, sapu tavetena sa mañauru, sa pepeso, meke sa lamana, meke sari doduru likakalae saripu koa koa rini, meke zama guahe si asa: “Ele kamo mo sa totošo, ke lopu kaqu aqa kamahire.

⁷ Ba pana ivua sa mateana vina zuapa sa nana buki, si kaqu va gorevura ia Tamasa sa Nana hiniva golomona, sapu gua ele tozi vura nia Sa koari Nana nabulu, sapu sari na poropita^d,” gua si asa.

⁸ Beto asa sa mamalaini sapu ele avosia rau mae guana pa Mañauru si zama mae guahe pule koa rau: “La mamu hena vagia sa pepa ta viqusuna, sapu ta repahana pa limana sa mateana sapu turu pa lamana meke pa pepeso,” gua.*

⁹ Meke topue la si rau koa sa mateana, meke tepa ia rau koa sa sa pepa ta viqusuna hitekena. Meke zama mae koa rau si asa: “Mae vagia, mamu hena ia. Kote hilili pa tiamu si asa, ba pa nuzumu si kote lomosogua zipale.”

¹⁰ Meke vagia rau sa pepa ta viqusuna hitekena pa limana sa mateana, meke hena ia rau. Meke sipu va linilinia rau, si lomosogua zipale pa

* **10:5** Ekd 20:11; Diut 32:40; Dan 12:7; Em 3:7 * **10:8** Izk 2:8 kamo hinia 3:3

nuzuqu si asa. Ba mudina sipu onolia rau si hilili pa tiaqu si asa.

¹¹ Meke tozi nau sa si rau: “Keke totošo pule mamu korokorotae ni sari na tinoni koari soku butubutu, na popoa, na vinekala meke sari na baṅara,” gua si asa.

11

Sari Karua Tie Paleke Inavoso te Tamasa

¹ Meke ta poni nia rau si keke kolu pada-padana, meke zamau sa mateana si rau: “Mamu la pada ia sa Zelepade te Tamasa meke sa hope, mamu nae i tugo saripu vahesihi pa korapa Zelepade.*

² Ba mu lopu pada ia sa varivarigarana lavata pa sadana sa Zelepade, sina ele ta vala koari na tie huporo sa vasina asa. Meke kote ene viṅohae hoboria rini sa vasileana hopena koari ka made ṅavulu rua sidara.*

³ Meke kote ponini ṅiniraṅira rau sari karua Qua tie paleke inavoso te Tamasa saripu va sage poko baika, pude vata dogoro nia sa dia tinalotaṅa koari na sinea, meke kote tarae nia rini sa inavoso te Tamasa koari keke tina karua gogoto onomo ṅavulu puta rane,” gua.

⁴ Arini sari karua huda olive, meke sari karua tuturuana zuke, sapu turu pa kenuna sa Baṅara tanisa popoa pepeso.*

⁵ Meke pude podekia rina tie pude ṅoṅovali sarini, si vura mae pa ṅuzudi ri kara sa nika, meke sulu pani sari na kana. Ke koasa sirana

* **11:1** Izk 40:3; Zak 2:1-2 * **11:2** Lk 21:24 * **11:4** Zak 4:3, 11
kamo hinia 14

gua mo asa, si kote tava mate si arini pu hiva n_onovali sari kara.

⁶ Meke ta vala tugo koa ri kara sa n_inira_nira pude va nosoa sa ruku pa galeglearane, pude loke ruku koasa doduruna sa tooso sapu hoke tozi vura nia rini sa Inavoso te Tamasa. Meke ta poni n_inira_nira sari kara pude va ilirae ni ehara sari na kolo, meke pude vata eva_ni tugo sari na oza votivotikaedi pa popoa pepeso, tooso hiva nia ri kara.*

⁷ Meke sipu ele va hokoti ri kara sari na dia tooso, pude tozi vura nia sa Inavoso te Tamasa, si kote vura mae pa korapa pou loke kokoina sa kurukuru kaleana, meke kote razai sa sari kara, meke kote va kilasi na va matei sa si arini.*

⁸ Meke sari na to_matedi ri karua tie paleke inavoso si kote eko pa korapa sira_nana sa vasileana nomana. Koasa vasileana asa si tava mate pa korosi sa dia Ba_nara, meke hoke ta pozae keke_no_no gua tugo Sodomu meke Izipi sa vasileana asa.*

⁹ Meke koari ka neta rane kukuruna, si kote dogori ri doduru tie pa ninae butubutu, na vinekala, na popoa, sari na to_matedi ri kara, meke kote korodia pomunu ni rini sari kara.

¹⁰ Meke kote qetuqetu hola sari doduru tinoni pa popoa pepeso koasa minate tadi kara, meke kote varivariponi vinariponi sarini, sina n_onovala sisigiti ri kara hire sari doduru tinoni pa vina kilasa te Tamasa.

¹¹ Meke sipu hola tugo ka neta rane kukuruna,

* **11:6** 1 Ba_n 17:1; Ekd 7:17-19; 1 Samuela 4:8 * **11:7** Dan 7:7,21;

Rev 13:5-7, 17:8 * **11:8** Ais 1:9-10

si sino lani tinoa Tamasa sari kara, ke gasa turu sari kara. Meke matagutu na tarazuzu si arini pu dogorodi sari kara.*

¹² Meke avosia ri karua tie paleke inavoso te Tamasa sa mamalaini pa manauru, sapu velavela va ululae mae guahe koa rini, "Sage mae tani!" Meke dogori rina dia kana sagedi la pa Manauru pa korapa lei si arini.*

¹³ Meke pa toতোসা tugo asa si kamo si keke niu nomana hola, meke hoqa ta huara inete si keke koari ka manege puta pinaqahadi rina vetuvetu koasa vasileana, meke ari ka zuapa tina tie si mate. Meke sari na tie pu koa holadi si matagutu na tarazuzu, ke vahesia mo rini sa Tamasa lavata pa Manauru.*

¹⁴ Ego, sa tinalotana vina rua meke kaleana si ele hola, ba sa tinalotana vina neta si tata kamo hokara mo!

Sa Buki Vina Zuapa

¹⁵ Meke ivua sa mateana vina zuapa sa nana buki, meke ta avoso sa mamalainidi ri pa Manauru pu zama va ululae guahe:

"Sa binanara pa popoa pepeso
si na Binañara tanisa nada Bañara meke sa
Nana Karisito^d kamahire,
meke kote koa Bañara si Asa ninae rane ka
rane!"*

¹⁶ Meke sari ka hiokona made koimata ta ronuedi pu habotu pa dia habohabotwana banara pa

* **11:11** Izk 37:10 * **11:12** 2 Bañ 2:11 * **11:13** Rev 6:12, 16:18

* **11:15** Ekd 15:18; Dan 2:44, 7:14,27

kenuna sa Tamasa, si hoqa todoño, meke vahesia rini sa Tamasa,

17 meke zama pa vinahesi sapu guahe:

“Ke, Baṇara, sa Tamasa pu tagoi sari doduru
 niniranira,
 sapu koa pukerane, meke sapu korapa koa
 kamahire,

zama valeana si gami koa Goi,
 sina koasa Mua niniranira lavata,
 si podalae nia Goi sa Mua Binaṇara!

18 Ta ṇaziri sisigiti sari na tie huporo,*
 meke kamahire si ta ṇaziri tugo si Goi.

Ele kamo sa totošo pude di ta pitu sari doduru
 pu matedi,
 meke pude ta pia tugo sari na Mua nabulu
 poropita,

meke sari na Mua tie,
 meke sari doduru pu pamaṇa nigo hiteke na
 lavata.

Meke ele kamo sa totošo pude va kilasi pa
 tinahuara sarini
 pu huara va ineti sari na tiena sa popoa
 pepeso.”

19 Ta tukele sa sasadana sa Zelepade te Tamasa
 pa Maṇauru. Meke ta dogoro pa korapana sa
 Nana Zelepade sana sa Bokese tanisa Vinariva
 Egoi te Tamasa. Meke malara va hodaka sari
 na kapi, meke pidala, na lulusu sari na paka
 maṇauru, niu sa popoa pepeso, meke na rane
 boṇi nomana si va hoqa gore mae i sari na
 kabukabue aesi nomadi.*

* 11:18 Sam 2:5, 110:5; Sam 115:13 * 11:19 Rev 8:5, 16:18

12

Sa Barikaleqe meke sa Ratovo

¹ Meke vura mae pa galegalearane si keke vina gilagila arilaena, sapu variva magasana: keke barikaleqe si ta dogoro sapu pokopoko nia sa sa rimata, meke netia sa sa sidara pa nenena, meke toropae ni sa sari ka manege rua pinopino.

² Meke aritiana sa barikaleqe, meke ta sigiti na hilala na tata podo koburu si asa.

³ Beto asa si keke vina gilagila pule si vura mae pa mañauru: vura mae si keke ratovo ziñaziñara nomana hola sapu ka zuapa batuna, meke ka manege puta kikhona, meke hopeke va hake toropae bañara sari na batuna.*

⁴ Meke hiru gore nia pikutuna sa si keke koari ka neta pinaqahadi rina pinopino pa mañauru, meke va hoqa gore lani sa pa pepeso si arini. Meke la sa ratovo pa kenuna sa barikaleqe pu tata podopodo, pude onolo toa ia gana sa haha sapu kote podoa sa, gua.*

⁵ Meke podoa sa barikaleqe si keke tuna koreo pu kote tagoi sari doduru ninirañira pude bañara ni sari doduru butubutu. Ba ta harupu sage koe Tamasa pa Nana habotuana Bañara sa koburu.*

⁶ Meke govete la nana pa soloso qega sa barikaleqe, vasina pu ele va nama veko nia Tamasa pude kopu nia rini si asa, koari ka keke tina karua gogoto onomo ñavulu puta rane.

* 12:3 Dan 7:7 * 12:4 Dan 8:10 * 12:5 Ais 66:7; Sam 2:9

⁷ Meke ta eva_{na} sa vinaripera pa Ma_{na}uru. E Maekolo meke sari nana puku mateana, si raza ia sa ratovo, meke sa ratovo meke sari nana puku mateana si raza hobedia.*

⁸ Ba tava kilasa sa ratovo meke sari nana mateana, ke loke dia vasina hokara pude koa pa Ma_{na}uru si arini.

⁹ Meke ta gona gore sa ratovo nomana, sapu sa noki pukeranena hola, sapu ta pozae sa Devolo babe Setani. Ta gona gore pa pepeso si asa, meke sari doduru nana mateana. Meke sekesekei ni sa sari doduru tie pa kasia popoa.*

¹⁰ Meke avosia rau si keke mamalaini pa Ma_{na}uru, sapu velavela va ululae guahe: “Ele kamo kamahire sa tinaharupu, sa niniranira, meke sa Bina_{na}ra tanisa nada Tamasa, meke sa niniranira tanisa Nana Karisito. Ura ele ta gona gore la pa pepeso si asa pu zutui sari na tasida koe Karisito, pa kenuna sa nada Tamasa boni na rane.*

¹¹ Meke ele koa mataqara meke va kilasia rini si asa koasa eharana sa Lami, meke koasa hinelahelaena sa Inavoso Leana. Meke lopu ruriti rini sari na dia tinoa kamo pa minate.

¹² Gua asa, ke mu koa qetuqetu agoi na Ma_{na}uru, meke gamu doduru pu koa koa sa. Ba mi talota_{na} gemi si gamu na pepeso meke na lamana! Ura ele gore atu koa gamu sana sa Devolo pa nana tina_{na}ziri lavata, sina gilania sa sapu papakana hokara mo sa nana to_{to}so,” gua.

¹³ Meke to_{to}so dogoria sa ratovo sapu ele ta

* **12:7** Dan 10:13,21, 12:1; Zd 9 * **12:9** Zen 3:1; Lk 10:18

* **12:10** Zob 1:9-11; Zak 3:1

gona gore la si asa pa pepeso, si podalae hata lulia sa sa barikaleqe sapu ele podona sa koburu koreo.

¹⁴ Meke ta vala koasa barikaleqe sari karua tatapuru atata nomadi, pude boka tapuru govete la si asa pa soloso qega. Meke koa si asa vasina pu ele va nama veko nia Tamasa, pude ta kopue si asa pa neta vuaheni kukuruna, vasina pu lopu kamoā sa ratovo.*

¹⁵ Meke totolo vura pa nuzuna sa ratovo sa kolo, gua tugo na ovuku naqena pu luli la pa mudina sa barikaleqe, pude mani paleke taloa nia gana, gua.

¹⁶ Ba toka nia sa popoa pepeso sa barikaleqe, meke ta viqala sa pepeso, meke nuquru gore sa naqe sapu va totolo vura ia sa ratovo pa nuzuna.

¹⁷ Meke ta naziri sisigiti nia sa ratovo sa barikaleqe, ke la pude razai sa sari kaiqa tuna pule sa barikaleqe, sarini pu va tabei sari na tinarae te Tamasa, pu tuqe va nabu pa rinaṇerane, meke tozi vura nia sa inavosona sa guguanā e Zisu Karisito.

¹⁸ Meke turu sa ratovo pa masamasa.

13

Sari Karua Kurukuru Kaleadi

¹ Meke dogoria rau si keke kurukuru sapu korapa vura sage mae pa lamana, sapu ka manege puta kikihona meke ka zuapa batuna; meke hopeke ri na kikihona si va hake toropae baṇara. Meke ta kubere pa hopeke batudi sa

* **12:14** Dan 7:25, 12:7

zinama vinahesi pule, sapu na tamasa si arini, gua.*

² Meke sa kurukuru kaleana hie sapu dogoria rau si gua tugo na leopardi, meke sari na nenena si gua tugo na nene bea, meke sa nuzuna si gua tugo na nuzu laione. Meke vala nia sa ratovo koasa sa nana ninirañira pude koa banara koa sa nana habotuana banara.*

³ Meke dogoria rau sapu keke ri na batuna si bakora va kaleana, guana kote mate nia tu sa, ba ele ibu nana tu. Ke magasa nia rina tie pa doduruna sa kasia popoa, meke lulia rini si asa.

⁴ Meke vahesia rini sa ratovo, sina vala nia sa koasa kurukuru kaleana sa ninirañira, meke vahesia tugo rini sa kurukuru asa, meke zama: “Esei si ninira gua sa kurukuru? Meke esei si garo pude varipera koa sa, meke va kilasia si asa?” gua si arini.

⁵ Meke tava malumu sa kurukuru pude vahesihihesi pule nia na poza pule nia tamasa, meke tago ninirañira pude koa banara koari ka made navulu rua sidara.*

⁶ Meke podalae zama nonoivalia sa sa Tamasa meke sa Pozana, meke sa Nana vasina pu koa ia Sa, meke gua tugo sarini pu koadi pa Manauru.

⁷ Meke tava malumu si asa pude razai sari na tie te Tamasa, meke pude va kilasi si arini. Meke ta vala koasa sa ninirañira pude banara ni sari doduru tinoni pa ninae butubutu, na vinekala, na popoa, gua.*

* **13:1** Dan 7:3; Rev 17:3,7-12 * **13:2** Dan 7:4-6 * **13:5** Dan 7:8,25, 11:36 * **13:7** Dan 7:21

⁸ Meke sari doduru tiena sa popoa pepeso si kaqu vahesia si asa. Ba lopu sarini pu ele ta kubere pozadi pa buka tinoa tanisa Lami, sapu ele vizata vekoi Tamasa pude tava mate, seunae gua tava podaka sa kasia popoa.*

⁹ Asa sapu ari taliņana si mani avosia!

¹⁰ Ke asa sapu kote ta turana taloa pa tinaraovo^d, si mani ta turana taloa tugo pa tinaraovo. Meke asa sapu kote tava mate si mani tava mate nia tugo sa vedara. Ura hire tugo sari na tooso pude turu va nabu pa rinaņerane koe Karisito sari na tie te Tamasa.*

¹¹ Meke dogoria pule rau si keke kurukuru kaleana sapu vura sage mae pa pepeso. Meke koa ia karua kikhona pu doņo guana kikiho lami, meke sa mamalaiņina si guana ratovo.

¹² Meke nabulu nia sa sa kurukuru kekenu, meke koasa doduru nana niniraņira si tave-tavete si asa, pude ososo ni sari doduru tie pa kasia popoa pude vahesia sa kurukuru kekenu. Asa sa kurukuru sapu ele bakora, meke doņo guana lopu sana kote mate. Ba hola sapu gua asa, si ibu tu sa bakorana.

¹³ Meke va vura tinavete variva magasadi sa kurukuru vina rua, meke garunu gore mae nia tugo sa pa pepeso sa nika pa maņauru pa kenudi ri na tie.

¹⁴ Meke sekesekei ni sa sari doduru tiena sa popoa pepeso, koari na tinavete variva magasadi saripu tava malumu ni sa pude taveti, pude zuka ia sa kurukuru kekenu. Meke tozi ni sa saripu koadi pa pepeso, pude tavetia si keke beku pa

* 13:8 Sam 69:28 * 13:10 Zer 15:2, 43:11

kinohana sa kurukuru kekenu, sapu ele tava bakora magu varipera, ba lopu mate.

¹⁵ Meke ta vala sa niniranira koasa kurukuru vina rua, pude mani sino la nia tinoa sa beku kinohana sa kurukuru kekenu, pude boka zama si asa. Meke tozi nia sa beku pude va matei sari doduru pu lopu vahesia si asa.

¹⁶ Meke ososo ni sa kurukuru vina rua sari doduru tie, hiteke na lavata, tagotagodi na habahualadi, tie ta rupahadi meke na pinausu, pude veko vina gilagila pa kali lima mataodi, babe pa raedi.

¹⁷ Meke loke tie si tava malumu pude vari-holuholue, be lopu tagoa sa sa vina gilagila hie, sapu sa pozana sa kurukuru kaleana, babe sa nabana sa pozana.

¹⁸ Ego, hire tugo sari na vina gilagila tomedi: Asa sapu ari nana ginilagilana si mani tavete vura nia sa nabana sa kurukuru. Ura sa naba onomo gogoto onomo navulu onomo si tozi vura nia sa pozana sa tie hie.

14

Sa Lami meke sari Nana Tinoni

¹ Meke toso doño la si rau si dogoria rau sa Lami sapu korapa turu Nana pa toqere Zaione^d. Meke turu turanae dia koa Sa sari ka keke gogoto made navulu made tina tinoni. Meke ta kubere pa raedi sa pozana Sa, meke sa pozana sa Tamana.*

² Meke avosia rau si keke mamalaini sapu mae guana pa Manauru, sapu guana ovanadi rina

* **14:1** Izk 9:4; Rev 7:3

tovovo vari tomotomoidi, meke pidala guana paka mañauru, meke guana mamalainidi ri pu mikemike.

³ Meke kera nia rini si keke kinera vaqurana pa kenuna sa ñati habotuana Bañara, meke pa kenudi ri ka made kurukuru toadi, meke ri na koimata. Meke loke tie pule si hite va nonoga ia sa kinera, ba sari ka keke gogoto made ñavulu made tina tinoni mo pu ele holu vagi Tamasa pa popoa pepeso koasa eharana Karisito.

⁴ Hire tugo sari na tie pu lopu va boni pule ni dia tinoa koari na hahanana kaleadi, ba soto va nabu koe Tamasa, kekeñoño gua na vineki vaqura pu lopu hite koa turaña keke tie, ba kaqu koa soto mo koasa tie pu kaqu haba ia sa. Ba luli lamae ia rini sa Lami doduru toso. Meke hire tugo sari na tie pu holu vagi pule ni Tamasa koari na tie pa kasia popoa, pude na tie tanisa meke tanisa Lami, kekeñoño gua tugo rina vua kenudi pu ta poni koasa Tamasa.

⁵ Namu lopu hite kokoha si arini, ba toñoto meke loke tinazutudi.*

Sari ka Ñeta Mateana

⁶ Meke beto asa si dogoria rau si keke mateana sapu tapuru va ululu sage pa galegalearane, sapu palekena sa Inavoso Leana sapu koa ninae rane ka rane, pude tozi vura nia koari na tinoni pa ninae butubutu, na vinekala, meke na popoa.

⁷ Meke zama va ululae si asa, “Mi pamaña nia na vahesia sa Tamasa! Ura ele kamo sa toso varipitui tanisa. Mi vahesia si Asa pu tavetena

* 14:5 Zepa 3:13

sa Mañauru, sa pepeso, sa lamana, meke sari na bukahadi ri na kolo!” gua si asa.

⁸ Meke luli mae gana pule si keke mateana vina rua, meke zama: “Ele huara! Ele ta huara va inete sa popoa Babiloni, sa nati vasileana lavata. Sina ele ta turana va sea pa nana hahanana maqota sari na tie koari doduru butubutu, guana va viviri ni vaeni variva pekipekina sa si arini,” gua.*

⁹ Meke luli la gana koari kara sa mateana vina neta, meke velavela va ululae guahe: “Arini pu vahesia sa kurukuru kaleana, meke sa beku sapu ta tavete luli pa kinehana sa, meke vekoa pa raedi, babe pa limadi sa vina gilagila tanisa kurukuru,

¹⁰ si kaqu va napo ni Tamasa sa doduruna sa niniranira tanisa Nana kapa tinanaziri nomana hola. Meke kote tava sigiti hola pa nika meke pa kolo nai lerana si arini, pa kenudi ri na mateana hopedi te Tamasa meke sa Lami.*

¹¹ Meke sa tunahana sa nika vasina koa ta sigiti si arini, si vura sage ninae rane ka rane. Meke loke ari makudona rane na boni sa tinasigiti tadirini pu vahesia sa kurukuru kaleana meke sa beku, sapu sa kinehana sa. Gua tugo asa sa tinasigiti tadirini pu ele vagia sa vina gilagilana sa pozana sa,” gua.*

¹² Ke hire tugo sari na totooso pude turu va nabu sari na tie te Tamasa, saripu va tabei sari Nana

* **14:8** Ais 21:9; Zer 51:8; Rev 18:2 * **14:10** Ais 51:17; Zen 19:24;
Izk 38:22 * **14:11** Ais 34:10

tinarae, meke soto va nabu pa dia rinaṇerane koe Zisu.

¹³ Meke toṭoso asa si avosia rau si keke ma-malaini mae guana pa Maṇauru, sapu zama guahe: “Mu kuberia sapu guahe: Tamanae tugo saripu koa keke koasa Baṇara, pu mate kamahire meke gua tugo saripu kote mate vugo repere! Uve! Ura, kote magogoso koari na dia tinavete mamatadi si arini, meke kote piai tugo Tamasa si arini koari na dia tinavete leadi,” gua sa Maqomaqo Hope.

Sa Totoso Pakepakete pa Popoa Pepeso

¹⁴ Meke doṇo la si rau, meke dogoria rau si keke lei keorona, meke habotu Nana koasa lei si keke, sapu doṇo gua tugo sa Tuna na Tie, meke toropae nia Sa sa toropae Baṇara sapu ta tavetae golo, meke taṇinia Nana pa limana si keke magu ṇaruna tana pakepakete huiti.*

¹⁵ Meke vura mae pa korapa Zelepade si keke mateana pule, meke velavela va ululae la guahe koa Sa pu korapa habotuna pa lei: “Mu paleke la nia sa Mua magu ṇaruna mamu la pakepakete. Ura ele kamo sa toṭoso pude pakepakete sina ele komiha sa popoa pepeso!” gua.*

¹⁶ Meke hiru nia Sa pu habotuna pa lei sa Nana magu pa popoa pepeso, meke ta pakete vagi sari na tiena sa popoa pepeso.

¹⁷ Meke keke mateana pule si vura mae gua koasa Zelepade pa Maṇauru, meke palekia nana tugo si keke magu pakepakete ṇaruna.

* **14:14** Dan 7:13 * **14:15** Zol 3:13

18 Meke keke mateana pule sapu kopuna sa nika pa hope^d, si vura mae gua vasina, meke zama va ululae la guahe koa Sa pu tañinina sa magu pakepakete naruna: “Mu palekia sa mua magu pakepakete naruna, mamu pakete vagi sari na tie guana kata qurepi^d koari na inuma vaeni pa popoa pepeso, sina ele sagana sari qurepi!” gua.

19 Meke hiru nia sa mateana sa nana magu pakepakete naruna koasa popoa pepeso, meke vagi varigara ni sa sari na tie guana kata qurepi, meke oki lani rini koasa munamunalana kolo vaeni tanisa tinañaziri te Tamasa.

20 Meke tava mate sari na tie meke vura eharadi gua sapu ta neti sari na qurepi pa munamunalana pa sadana sa vasileana lavata. Totolo vura guana naqe sa eharadi koasa munamunalana tinañaziri te Tamasa, la tu pa seu padana neta gogoto kilomita meke tata karua mita lamanana gua.*

15

Sari na Mateana meke sari na Oza Vina Betobeto

1 Meke dogoria rau pa Mañauru si keke vina gilagila arilaena pule meke variva magasana. Koa dia sari ka zuapa mateana meke hopeke dia oza vina betobeto. Ura pana ta evaņa sari na oza hire, si beto tugo sa tinañaziri te Tamasa.

2 Meke dogoria rau si keke tinitona sapu dono guana kolo, sapu bule sisigiti meke kekenono

* 14:20 Ais 63:3; KTZ 1:15; Rev 19:15

guana qelasi viana, meke varihenie nika si asa. Meke dogori rau sarini pu koa mataqara hola nia sa kurukuru kaleana, meke sa bekuna sa, meke sa nabana sa pozana sa, sina lopu vahesia rini sa kurukuru. Korapa turu kapae dia si arini koasa kolo sapu guana qelasi, meke taṅini dia pa limadi sari na mike saripu poni ni Tamasa koa rini.

³ Meke kera nia rini sa kinera te Mosese, sa nabulu te Tamasa, koa sa gugwana sa Lami, sapu guahe:*

“Baṅara, Tamasa pu tagoi sari doduru
nīniranira,
sari na Mua tinavete si arilaedi na variva
magasadi!

Agoi sa Baṅara ninae rane tadi na butubutu,
tonoto meke hinokara sari na Mua ha-
hanana.

⁴ Baṅara, doduru tie si kote pamaṅa nigo,*
meke kote va lavatia sa Pozamu.

Ura, Agoi mo telemu si hopemu,
meke sari doduru tie pa ninae popoa
si kote mae vahesigo mo si Agoi.

Ura sari na Mua tinavete toṅotodi,
si ele vata dogoro ni Goī koa ri na tie,” gua.

⁵ Beto asa, si doṅo la si rau meke dogoria sapu ta tukele sa Zelepade sapu sa Ipi^d Hopena te Tamasa pa Maṅauru.*

⁶ Meke vura mae pa korapana sa Zelepade sari ka zuapa mateana, saripu paleke mae ni sari ka zuapa oza. Meke pokopoko lineni sapu keoro meke ṅedaladi si arini, meke dikuru ni rini pa raqaraqadi sari na qolo.

* 15:3 Ekd 15:1 * 15:4 Zer 10:7; Sam 86:9 * 15:5 Ekd 38:21

⁷ Meke keke koari ka made kurukuru toadi si vala ni koari ka zuapa mateana sari na baolo qolo sapu si_{ni} na tinanaziri tanisa Tamasa sapu toa holana ninae rane ka rane.

⁸ Meke si_{nia} na tunaha sa korapana sa Zelepade sapu mae guana koasa ninedalana sa Tamasa meke koasa Nana ninirana. Ke loke tie hokara si boka nuquru la vasina, osolae tava gorevura beto tu sari ka zuapa oza tadi ka zuapa mateana.*

16

Sari na Baolo Tanisa Tinanaziri te Tamasa

¹ Meke avosia rau si keke mamalaini sapu mae guana pa Zelepade, sapu zama va ululae guahe koari ka zuapa mateana: “La mamu titisi gore ni pa popoa pepeso sari ka zuapa baolo tanisa tinanaziri te Tamasa,” gua.

² Meke la titisi gore nia sa mateana vina keke sa nana baolo pa popoa pepeso. Meke razai na tubu sapu vari sisigiti si arini pu vagia sa vina gilagila tanisa kurukuru kaleana, meke sarini pu vahesia sa bekuna sa.*

³ Meke sa mateana vina rua si titisi gore la nia pa lamana sa nana baolo. Meke ta evanae gua tugo na eharadi ri na tie matedi sa kolo, meke mate beto sari doduru tinitona toadi pa lamana.

⁴ Meke sa mateana vina neta si titisi gore la nia sa nana baolo koari na leana na ovuku, meke koari na kolo bukaha, meke ta ilirae ehara si arini.*

* 15:8 Ekd 40:34; 1 Ban 8:10-11; 2 Koron 5:13-14; Ais 6:4 * 16:2

Ekd 9:10 * 16:4 Ekd 7:17-21; Sam 78:44

⁵ Meke avosia rau sa mateana tadi na kolo, sapu zama guahe:

“Agoi sapu Hopemu, sapu ele koa pukerane, meke sapu korapa koa kamahire, tonoto sari na Mua vina kilasa koari na tie kaleadi hire.

⁶ Ura va matei rini sari na Mua tie, meke sari na poropita, meke tava zoloro sari na eharadi, meke va napo ni ehara Goi si arini pu variva mate, ura pada tugo sa vina kilasa asa koarini!”

⁷ Meke avosia rau si keke mamalaini sapu vura mae guana koasa hope, sapu zama guahe:

“Uve, Baṅara na Tamasa pu tagoi sari doduru niniraṅira, tonoto meke hinokara hola sari na Mua vina kilasa!” gua.

⁸ Meke titisi la nia sa mateana vina made sa nana baolo koasa rimata, meke tava ninira sa nadana sa, pude kina va sisigiti na rimata sari na tie.

⁹ Meke ta kina va sisigiti nia rina tie sa maninina sa rimata, ke zama va kaleania rini sa Tamasa meke sa pozana Sa, sapu ari Nana niniraṅira koari na oza hire. Ba korodia luara pani rini sari na dia sinea, pude vahesia sa Tamasa.

¹⁰ Meke titisi la nia sa mateana vina lima sa nana baolo koasa habotuana baṅara tanisa kurukuru kaleana, meke tava hupoṛo dudukurumu sa popoa vasina koa baṅara sa kurukuru kaleana, meke garata livodi sari na tie, ura na ta sigiti si arini.*

* **16:10** Ekd 10:21

¹¹ Meke zama va kaleania rini sa Tamasa pa Mañauru koari na dia tinasigiti na vinagauru, ba lopu hite luara pani rini sari na dia tinavete kaleadi.

¹² Meke titisi la nia sa mateana vina onomo koasa Ovuku Iuparetisi sa nana baolo, ke popa sa kolona, pude va nama nia sa sirana tadi na banara pu mae guadi pa kali gasa rimata.*

¹³ Meke beto asa si dogori rau sari ka neta maqomaqo kaleadi saripu dono gua na bakarao, sapu hopeke vura mae guadi pa nuzuna sa ratovo, meke pa nuzuna sa kurukuru kaleana, meke koasa poropita kokohana.

¹⁴ Arini sari na maqomaqo kaleadi saripu hoke va vura tinavete variva magasadi. Meke vura la si arini koari na banara pa doduruna sa popoa pepeso, pude varigara ni, pude varipera koasa rane nomana tanisa Tamasa pu tagoi sari doduru niniranira.

¹⁵ “Dotu! Kote atu kamo va hodaka guana tie hikohiko si Rau! Ba tamanae tugo si asa sapu vanunu doduru toso, meke va nama vekoi sari nana poko, pude lopu ene dododohona meke tava kurekure pa korapa kobi tie,” gua se Zisu.*

¹⁶ Meke varigara ni rina maqomaqo kaleadi sari na banarana sa popoa pepeso pa keke vasina, sapu ta pozae Amaqedoni pa zinama Hiburur.*

¹⁷ Meke titisi la nia sa mateana vina zuapa sa nana baolo pa galegaleane. Meke ta avoso si

* **16:12** Ais 11:15 * **16:15** Mt 24:43-44; Lk 12:39-40; Rev 3:3, 19:7,8 * **16:16** 2 Ban 23:29; Zak 12:11

keke mamalaiṅi sapu mae guana koasa habotuna Baṅara pa korapa Zelepade, sapu zama va ululae guahe: “Ele kamo sa totoṣo,” gua si Asa.

¹⁸ Meke malara va hodaka sari na kapi, meke pidala na lulusu sa paka maṅauru. Meke kamo si keke niu nomana hola, sapu lopu ele hite ta evaṅa seunae gua ta tavete sa tie pa pinodalaena sa kasia popoa.*

¹⁹ Meke balabala ia Tamasa si pa Babiloni sa ṅati vasileana lavata, ke va napo nia Nana kapa vaeni Sa si asa, sa kapa sapu siṅia sa Nana tinaṅaziri na vina kilasa nomana. Meke ta viqala ṅeta sa pepeso koasa vasileana lavata asa, meke sari na vasivasileana tadi doduru popoa si ta huara beto.*

²⁰ Meke sari doduru nunusa si lopu ta dogoro, meke sari na toqere ba namu lopu hite ta dogoro tugo.*

²¹ Meke hoqa gore koari na tie sari na kabuk-abue aesi, saripu lima ṅavulu kilo hopeke matadi gua. Meke zama va kaleania rini sa Tamasa, sina kaleana sisigiti sa oza asa.*

17

Sa Maqota Ta Avosaena

¹ Meke keke koari ka zuapa mateana sapu taṅinidi ri ka zuapa baolo, si mae koa rau meke zama guahe: “Mae maqu va dogoro nigo sa vina

* **16:18** Rev 8:5, 11:13,19 * **16:19** Ais 51:17 * **16:20** Rev 6:14

* **16:21** Ekd 9:23; Rev 11:19

kilasa sapu kote ta evaṅa koasa maqota sapu ta avosaena, sapu habotuna koari na kolo.*

² Sari na banara koasa popoa pepeso si ele somanae koasa nana binarabarata na vinarivosa, meke ele ta turana va sea sari na tiena sa popoa pepeso koasa nana hahanana maqota, guana napo viviri vaeni variva pekipekina si arini," gua.*

³ Beto asa si turanau sa mateana si rau koasa niniranira tanisa Maqomaqo Hope, meke la pa soloso qega. Meke dogoria rau vasina si keke barikaleqe sapu habotu nana koa keke kurukuru kaleana sapu zinazinarana, meke ta kubere pa doduru tinina sari na pozapoza vnahesi pule, sapu na tamasa ninira si asa, gua. Ka zuapa batuna, meke ka manege puta kikihona si asa.

⁴ Meke pokopoko pepolo na zinara sa barikaleqe hie, meke tava sarie qolo na patu arilaedi, meke na vovoto davi si asa. Meke taninia nana pa limana si keke kapa qolo, sapu sinia na hahanana variva kurekuredi, meke na bonidi ri nana binarabarata na vinarivosa.*

⁵ Meke hire sari pozapoza pu ta tome ginuadi saripu ta kubere pa raena:

BABILONI SA NATI VASILEANA LAVATA,
SA TINADIA RI DODURU MAQOTA,
MEKE SARI DODURU HAHANANA VARIVA
KUREKUREDI PA KASIA POPOA.

⁶ Meke dogoria rau sa barikaleqe sana sapu qetuqetu hola guana tie napo va viviri, sina ele va matei sa sari na tie te Tamasa, meke sarini pu tozi vura nia sa dia rinaṅeraṅe koe Zisu.

* 17:1 Zer 51:13 * 17:2 Ais 23:17; Zer 51:7 * 17:4 Zer 51:7

Meke sipu dogoria rau sa barikaleqe asa si magasa sisigiti si rau.

⁷ Meke nanasa mae guahe sa mateana koa rau, “Na vegua ke magasa si goi? Ego, maqu tozi va bakala poni nigo sa ginua tomena tanisa barikaleqe hie, meke sa kurukuru kaleana pu ka zuapa batuna meke ka manege puta kikhona sapu sa kurukuru vasina hake sa barikaleqe.

⁸ Sa kurukuru sapu dogoria goi sana si ele koa tu visoroihe, ba lopu koa si asa kamahire, ba kote vura sage mae pa korapa pou loke kokoina si asa, meke kote la koasa vina kilasa koa holana. Podalae tu pa pinodalaena sa kasia popoa, si ta kubere pozadi sari kaiqa tie pa buka tinoa. Ba pana dogoria ri na tie pu lopu ta kubere pozadi pa buka tinoa sa kurukuru kaleana, si kote magasa nia rini si asa. Asa sa kurukuru kaleana sapu ele koa visoroihe, ba lopu koa kamahire, meke sapu kote vura pule mae.*

⁹ Meke ta hivae sa ginilagilana lohina^d pude gilania sa ginuana sa kurukuru kaleana hie. Sari ka zuapa batuna si sari ka zuapa toqere, vasina pu habotu sa barikaleqe, meke ari ka zuapa banara tugo si arini.

¹⁰ Ka lima si ele hola sa dia binanara, keke si korapa koa, meke sa vina zuapa si lopu ele mae. Meke pana mae si asa si kaqu papakana mo sa nana toতোসো pude koa banara.

¹¹ Meke sa kurukuru kaleana sapu ele koa visoroihe, meke lopu koa kamahire, si asa tugo sa banara vina vesu, meke asa tugo si keke sapu

* **17:8** Diut 7:7; Rev 11:7; Sam 69:28

lulia sa hahanana tadi ka zuapa, sapu kote la koasa nana vina kilasa koa holana.

¹² Sari ka manege puta kikiho saripu dogori goi si ari ka manege puta banara, saripu lopu ele koa banara koari hopeke dia binanara. Ba pa keke toতোসো papakana hite mo, si kote koa banara turania rini sa kurukuru kaleana.*

¹³ Sari ka manege puta hire si keke mo sa dia hiniva, meke kaqu poni la nia rini sa dia niniranira koasa binanara tanisa kurukuru kaleana pude ninira sa nana tinarae.

¹⁴ Meke kote raza ia rini sa Lami, ba kote va kilasi Sa si arini. Ura Asa tugo sa Nati Hiniva tadi na nati hiniva, meke sa Banara tadi na banara. Meke kaqu koa mataqara turani tugo Sa sari Nana tie ta vizatadi, na ta tiokodi, saripu turu va nabu pa dia rinañerane koa Sa.”

¹⁵ Meke zama sa mateana koa rau: “Sari na kolo pu dogori goi vasina pu habotu sa maqota, si sari na tinoni meke sari na puku tie pa ninae butubutu, na vinekala, na popoa.

¹⁶ Sari ka manege puta kikiho, meke sa kurukuru kaleana saripu dogori goi, si kote kukiti nia rini sa maqota. Meke kote vagi betoi rini sari doduru nana likakalae saripu tagoi sa, meke va dodoho veko hola ia rini si asa, meke kote gania rini masana meke sulu pania rini si asa.

¹⁷ Ura ele vekoa Tamasa pa korapa bulodia, pude di va gorevura ia sa Nana hiniva. Meke va egoa rini pude vala nia koasa kurukuru kaleana sa dia niniranira pude koa banara si asa, osolae

* 17:12 Diut 7:24

kaqu tava gorevura beto sari doduru zinama te Tamasa.

¹⁸ Sa maqota sapu dogoria goi sana, si sa vasileana nomana, sapu banara ni sari doduru binanara pa popoa pepeso," gua.

18

Ta Huara Va Inete sa Vasileana Babiloni

¹ Beto asa, si dogoria rau si keke mateana pule sapu gore mae guana pa Mañauru. Meke tagoa sa sa niniranira nomana hola, meke malara la koasa kasia popoa sa ninedalana.

² Meke velavela va ululae guahe si asa: "Ele huara! Ele ta huara va inete sa popoa Babiloni, sa nati vasileana lavata, meke ele ta evaṇae na vasina tadi na tomate kaleadi na maqomaqo kaleadi, meke na kokoana tadi doduru kurukuru tapuru variva malederedi pu lopu henai rina tie."*

³ Ura ele somana ni ri doduru butubutu tie sari na hahanana kaleadi, na binarabarata, na vinarivosa na gua tanisa vasileana sana, guana napo viviri vaeni variva pekipekina si arini.* Meke sari doduru banarana sa kasia popoa, si ele somana tugo koari na nana hahanana maqota. Meke sari na tie varivari holuholue pa kasia popoa, si tagotago sisigiti koasa nana hahanana, pude okoro ni sari doduru tiniona sage hinoludi.

⁴ Meke avosia rau si keke mamalaini pule sapu mae guana pa Mañauru, sapu zama guahe:

* **18:2** Ais 21:9; Zer 50:39, 51:8; Rev 14:8; Ais 13:21; Zer 50:39

* **18:3** Ais 23:17; Zer 51:7

- “Gamu na Qua tinoni,*
 mi taluarae koasa popoa sana!
 Pude mi lopu somana koari nana hahanana
 kaleadi, meke pude mi lopu somana nia sa
 vina kilasa tanisa!
- ⁵ Ura ele vari tomotomoi sage pa Manauru sari
 nana sinea,*
 ke balabala i Tamasa sari doduru nana
 hahanana kaleadi.
- ⁶ Tavete pule la nia koa sa gua sapu ele tavete
 atu nia sa koa gamu:*
 mamu tomo rua pule la nia koa sa sa vina
 kilasa, padadi gua ri doduru pu ele tavete
 atu ni sa,
 va napo pule la nia koa sa, karua totošo,
 sa nana kapa telena, sapu sa vina kilasa
 tanisa.
- ⁷ Mani koa ta sigiti va kaleana na talotaña si asa,*
 sina visoroihe si va lavata pule nia meke vagi
 va soku pule nia tinagotago si asa.
 Ura sa barikaleqe sapu sa vasileana nomana si
 zama guahe pa korapa bulona:
 ‘Habotu guana banara maqota si rau, meke
 lopu na nabonaboko,
 meke lopu kote talotaña si rau vugo repere,’
 gua si asa.
- ⁸ Gua asa, ke pa keke rane mo si kote raza ia rina
 oza hire sa vasileana nomana sana:
 sa tinalotaña, sa soñe, meke sa minate.
 Meke kote ta sulu palae si asa pa nika.

* **18:4** Ais 48:20; Zer 50:8, 51:6,45 * **18:5** Zen 18:20-21; Zer 51:9

* **18:6** Sam 137:8; Zer 50:29 * **18:7** Ais 47:7-9

Ura n̄nira hola sa Tamasa, sa Baṅara sapu
va kilasia si asa.

⁹ Meke pana ta sulu si asa, meke dogoria
rina baṅara tanisa kasia popoa saripu somanae
koasa nana hahanana binarabarata, meke so-
mana tagotago sisigiti, si kote kaboa na talotaṅa
nia rini si asa.*

¹⁰ Meke kote turu pa seseuna vasinahite si
arini, sina matagutu nia rini sa nana tinasigiti.
Meke kote zama guahe si arini:

‘Variva talotaṅa hola si goi na n̄ati vasileana
lavata!

Agoi Babiloni pu tagoa sa n̄niraṅira no-
mana, pude tagotago sisigiti.

Ura pa totoṣo papakana mo si kamo koa goi sa
tinahuara!’ gua.

¹¹ Sari na tie holuholu pa kasia popoa, ba kote
kabo na talotaṅa nia tugo rini si asa. Ura loke tie
si kote holui sari na dia likakalae kamahire.*

¹² Loke tie si kote holu vagi sari na dia qolo,
na siliva, na patu arilaedi, meke sari na vovoto
davi. Meke gua tugo sari na poko lini arilaedi
saripu sage hola hinoludi, meke sari na poko
ziṅara, pepolo, meke sapu ta pozae silika. Meke
lopu boka holuholu ni rini sari doduru huda
arilaedi, na boronizi, na aeana meke na patu
noma hinoludi sapu ta pozae mabolo, meke sari
doduru tinitona saripu ta tavetae livo elopaniti,
meke na huda arilaedi.*

¹³ Meke saripu lopu ta holudi tugo, sari na
sinamoni, na vina uququ ruqa humaṅa lea, meke

* **18:9** Izk 26:16-17
27:12,13,22

* **18:11** Izk 27:31,36

* **18:12** Izk

sa meresena sapu ta pozae moa. Meke saripu lopu ta holudi guana kolo vaeni, na oela sapu ta vagi pa vua huda olive, meke na palava leadi meke na huiti. Meke gua tugo sari na bulumakao, na sipi, na hose, meke sari na totopili pu babani rini, meke gua tugo sari na pinausu pu ta holudi.

¹⁴ Meke kote zama la guahe koa sa sari na tie holuholu: ‘Sari doduru likakalae pu hola okoro ni goi, meke sari na tinitona lomosodi pu hoke henahenai goi, meke na tinitona pu dono lea hola, si ele ta novala beto, ke lopu kote hite dogoro pulei goi si arini.’

¹⁵ Meke sari na tie pu holuholu ni sari na tinitona sara, meke tago va sokusoku koari na dia tinavete holuholu koasa vasileana sana, si kote turu pa seseuna vasinahite si arini, sina matagutu nia rini sa nana tinasigiti. Meke kote kabo na talotana nia rini si asa.*

¹⁶ ‘Variva talotana hola si agoi na nati vasileana lavata.

Agoi pu pokopoko ni sari na poko lini
arilaedi, poko zinara na pepolo,
meke tava sarie qolo, na patu noma hinoludi,
meke na vovoto davi!

¹⁷ Ba pa totooso papakana mo si ta novala beto sari doduru likakalae,’ gua.*

Meke sari doduru koimata koari na vaka, na tie lulidi pa vaka, meke sari na tie tavetavete, saripu vagi poata koari na tinavete pa vaka, si kote turu pa seseuna vasinahite.

* 18:15 Izk 27:31,36 * 18:17 Ais 23:14; Izk 27:26-30

18 Meke sipu dono la ia rini sa tunahana sa nika sapu sulua sa vasileana, si kote talotana si arini, meke zama guahe: 'Namu loke vasileana hokara si arilaena kekenono gua sa nati vasileana lavata hie,' gua si arini.*

19 Meke kote taburu ni kavuru rini sari na batudi, pude vata dogoro nia sa dia tinalotana, meke kabo meke zama guahe:

'Variva talotana hola,

sa nati vasileana lavata.

Koasa nana tinagotago nomana,

si ele vagi va soku poata sari doduru pu ari dia vaka saripu hoke ene lamae pa lamana!

Ba pa totošo papakana mo si ta huara beto sari doduru pu tagoi sa,' gua si arini.'**

20 Meke zama pule sa mateana, "Mi koa qetuqetu si gamu pa Manauru, meke gamu na tie te Tamasa, na apositolo, meke na poropita.

Ura huara betoa Tamasa sa popoa Babiloni, sina ele nonovala gamu sa si gamu.'**

21 Beto asa, si ovulu vagia keke mateana ninirana si keke patu nomana lavata, meke buli la nia sa pa lamana peava, meke zama guahe:

"Kaqu tava kilasa pa tinahuara nomana si pa Babiloni, sa nati vasileana lavata,

kekenono gua sa patu nomana sapu ta buli gore la guahe pa lamana peava,

pude lopu hite kaqu ta dogoro pule si asa.*

* **18:18** Izk 27:32 * **18:19** Izk 27:30-34 * **18:20** Diut 32:43;
Zer 51:48 * **18:21** Zer 51:63-64; Izk 26:21

- 22 Lopu kaqu hite ta avoso pule koa goi sari na mamalainidi rina minikemike, na kinaera tadi na tie, na kevukare meke na ivivu, meke gua tugo sari na tie pu munala huiti pa patu, pude tavete palava.
Meke lopu kaqu ta dogoro pule sari na tie pu bokadi tavetavete pa limadia.* *
- 23 Namu lopu kote hite ta dogoro pule sa kalalasangana sa zuke koa goi, meke lopu kote hite ta avoso sari na mamalainidi rina koreo na vineki pu ta varihabae.
Sari na mua tie holuholu si koa ululu hola pa dia niniranira meke arilaedi pa kasia popoa.
Meke koasa kinehana sa mua hahanana kaleana na inoko'okoro sea si ta turaŋa va sea sari doduru butubutu, koa sa mua vinakuvakutae kokohadi!" gua.
- 24 Tava kilasa si asa sina ta zutu ni sa sari na eharadi ri doduru pu tava mate koasa: sari na tie te Tamasa, sari na poropita, meke sari doduru pu tava mate pa kasia popoa.*

19

Sa Vinahesi pa Manauru

¹ Beto asa, si avosi rau soku hola tie pa keke vinarigara lavata pa Manauru, saripu velavela guahe:

"Vahesia sa nada Tamasa!
Ura Tanisa tugo sa tinaharupu, na vina lavata, meke sa niniranira.

* 18:22 Izk 26:13; Ais 24:8 * 18:22 Zer 7:34, 25:10 * 18:24 Zer 51:49

2 Meke sari Nana vinilasa si hinokara meke tonoto!
 Ura ele va kilasia Sa sa vasileana sapu gua na maqota sapu ta gilana hola,
 sapu ele turana va sea ia sa sa popoa pepeso koasa nana hahanana barabarata.
 Ke va kilasia Tamasa si asa, sina va matei sa sari Nana nabulu.”*

3 Meke velavela va ululae pule si arini, meke zama:
 “Vahesia sa Tamasa!
 Ura tunaha sage sa nika pu lopu ari matena, sapu suluna sa vasileana nomana lavata sana.”*

4 Meke hoqa todoño sari ka hiokona made koimata ta ronuedi, meke sari ka made kurukuru toadi, meke vahesia rini sa Tamasa koasa Nana habotuana Bañara, meke velavela guahe si arini:
 “Uve, gua tugo! Vahesia sa Tamasa!” gua si arini.

Sa Inevana Vinarihaba Tanisa Lami

5 Meke vura mae koasa habotuana Bañara si keke mamalaini sapu zama guahe:
 “Mada vahesia sa nada Tamasa, gamu doduru nana nabulu,
 meke gamu doduru tinoni pu pamaña nia si Asa, hiteke na lavata,” gua.*

6 Meke beto asa si avosia rau si keke mamalaini, sapu guana mamalainina keke vinarigara lavata, meke guana ovañadi rina tovovo vari tomotomoidi, meke guana pidalana sa paka manauru. Meke zama guahe si arini:
 “Vahesia sa Tamasa!

* 19:2 Diut 32:43; 2 Bañ 9:7 * 19:3 Ais 34:10 * 19:5 Sam 115:13

Ura sa Nada Tamasa pu tagoi sari doduru
nirinaira si na Baṅara!” gua.*

⁷ Mada koa qetuqetu si gita,
mada va lavatia si Asa!

Ura ele kamo sa totošo vinarihaba tanisa Lami,
meke ele va namanama sa Nana barikaleqe.

⁸ Meke sa poko lini ni memelesina, na nedalana,
meke viana si ta poni nia sa pude va sagea.
Ura sa poko lini ni memelesina si na tinavete
tonotodi tadi na tie te Tamasa.

⁹ Meke zama mae koa rau sa mateana, “Mu
kuberia sapu guahe: ‘Tamae si arini pu ta
ruvatadi koasa inevana vinarihaba tanisa Lami,’
gua. Ura arini tugo sari na zinama hinokaradi te
Tamasa,” gua sa mateana.*

¹⁰ Meke hoqa todoṅo pa nenena sa si rau, pude
vahesia si asa. Ba zama au sa, “Lopu tavete
gua asa! Arau si keke nabulu gua mo agoi,
meke na nabulu turaṅadi ri na tasimu goi pu ele
tuge va nabua, meke tozi vura nia sa inavosona
e Zisu Karisito. Mu vahesia mo sa Tamasa!
Ura sa inavoso sapu tozia Zisu si na natina sa
kinorokorotae,” gua.

Sa Tie sapu Koi koasa Hose Kekeoro

¹¹ Meke dogoria rau ta tukelena sa Maṅauru,
meke keke hose keorona si dogoria rau vasina.
Meke Asa sapu koi koasa si ta pozae Ta Ronuena
meke Hinokara. Meke pa tinonoto si varipitui
ni Sa sari na tie, meke varipera si Asa koari na
kana.*

* **19:6** Izk 1:24; Sam 93:1, 97:1, 99:1 * **19:9** Mt 22:2-3 * **19:11**
Izk 1:1; Sam 96:13; Ais 11:4

¹² Sari na matana si gua tugo na hurunu nika, meke sokudi toropae banara si va hakei Sa pa batuna. Meke ta kubere si keke pozapoza koa Sa, ba loke tie gilania si asa, ba Asa mo telena.*

¹³ Meke pokopoko nia Sa si keke poko doduru sapu ta ponana pa ehara. Meke sa pozana Sa si sa Zinama te Tamasa.

¹⁴ Meke luli somanae koa Sa sari puku qeto minate lavata pa Manauru, meke pokopoko ni rini sari na poko lini memesidi, keoro meke viadi, meke koi dia koari na hose keorodi.

¹⁵ Meke vura pa nuzuna Sa si keke magu varipera naruna, pude seke goreni Sa sari na butubutu. “Kote tagoi Sa sari doduru niniranira pude banara ni sari doduru butubutu.” Kote va matei Sa si arini koasa tinanziri nomana te Tamasa sapu tagoi sari doduru niniranira, guana neti vurani Sa sari kolo vaeni koari na qurepi pa munamunalana.*

¹⁶ Pa Nana poko doduru meke pa pudapudana si ta kubere sa pozapoza sapu zama guahe: “Sa Nati Hiniva tadi na nati hiniva, meke sa Nati Banara tadi na banara,” gua.

¹⁷ Meke dogoria rau si keke mateana sapu turu nana koasa rimata. Meke velavela va ululae la si asa koari doduru kurukuru saripu tapuru la mae pa korapa galeglearane, meke zama guahe:* “Mae, varigara mae koasa inevana lavata te Tamasa!

¹⁸ Mae mamu gani sari na masadi ri na banara, na nati koimata tadi na puku tie varipera, meke

* **19:12** Dan 10:6 * **19:15** Sam 2:9; Ais 63:3; Zol 3:13; Rev 14:20

* **19:17** Izk 39:17-20

sari na tie varane, sari na masadi rina hose, meke sari na tie pu koidi koa rini, meke sari na masadi ri doduru tie ta pausudi meke sarini pu lopu ta pausudi, hiteke na lavata!” gua.

¹⁹ Beto asa si dogoria rau sa kurukuru kaleana, meke sari na banara pa popoa pepeso, meke sari na dia qeto minate nomadi saripu varigara pude raza ia si Asa sapu koi koasa hose, meke sa Nana qeto minate.

²⁰ Meke ta tuqe vagi sa kurukuru kaleana, meke sa poropita kokohana, pu zuka ia sa kurukuru kaleana, meke taveti sari na tinavete variva magasadi, meke sekesekei ni si arini pu vagia sa vina gilagilana sa kurukuru kaleana pa tinidia, meke vahesia sa bekuna sa kurukuru kaleana. Toadi meke ta okie la pa korapa kopi nika lerana sari kara, vasina hurunu sa nai.*

²¹ Meke Asa sapu koi koasa hose si va matei sari na qeto minate tadirini pa Nana magu varipera sapu vurana pa nuzuna. Meke dena pata ni ri na kurukuru tapuru sari na masadi.

20

Keke Tina Vuaheni

¹ Meke dogoria rau si keke mateana sapu gore mae guana pa Manauru, meke taninia nana pa limana sa viduluna sa tukutukuna sa pou sapu loke kokoina, meke keke seni mamatana.

² Meke tuqe vagia sa sa ratovo, sa noki pukerana hola, sapu ta pozae sa Devolo, babe Setani,

* **19:20** Rev 13:1-18

meke pusi vekoa sa, pude koa ta pusi pa keke tina vuaheni.*

³ Meke oki gore la nia sa mateana pa korapa pou sapu loke kokoina si asa, meke vidulu tukua na tokoro hukatia sa si asa, pude mani lopu sekesekei pule ni sari na butubutu, osolae hola tu sa keke tina vuaheni. Meke pa mudina tu asa, si kaqu ta rupaha si asa, meke tava maluara taloa pa tooso papakana mo.

⁴ Meke dogori rau sari na habotuana banara, meke sarini pu habotudi koarini, saripu tava malumu pude varipitui. Meke dogori tugo rau sari na maqomaqodi rini pu ele ta kupa palae batudi, sina tuqe va nabua, meke tozi vura nia rini sa inavosona Zisu, meke sa zinama te Tamasa. Lopu vahesia rini sa kurukuru kaleana, meke sa bekuna sa, babe vekoa sa vina gilagilana sa kurukuru kaleana pa raedia babe pa limadia. Somana tava banara koe Karisito si arini pa keke tina vuaheni.*

⁵ Arini tugo si somana koasa tinuru pule kekenu tadirini pu matedi, ba sari tie matedi pule si lopu kaqu toa pule, osolae hola tu sa keke tina vuaheni.

⁶ Meke tamanae dia, na tava madi si arini pu somanae koa sa tinuru pule pa minate kekenu. Ura sa minate vina rua si loke nana niniranira koa rini, sina lopu ta vala koasa vina kilasa koa holana, ba kaqu na hiamata te Tamasa, meke te Karisito si arini. Meke kaqu koa banara turania rini si Asa koasa Nana Binañara pa keke tina vuaheni.

* 20:2 Zen 3:1 * 20:4 Dan 7:9,22

Tava Kilasa se Setani

⁷ Meke sipu hola sa keke tina vuaheni, si kaqu ta rupaha pa nana tinapusi se Setani.

⁸ Meke kaqu vura la sekesekei ni sa sari doduru butubutu pa kasia popoa, sari na butubutu pu ta pozae Qoqi meke Maqoqi. Meke kaqu varigara ni sa si arini pude varipera, meke sa ninaedi rini si gua tugo na onone pa masa.*

⁹ Meke ene karovia rini sa popoa pepeso, meke koa varilikohae nia rini sa vasina soti tadi na tie te Tamasa, sapu sa vasileana ta tataruena Tanisa. Ba kote gore mae pa Mañauru sa nika, meke sulu va mate betoi sarini.

¹⁰ Meke ta okie la pa korapa kopi nika lerana vasina huruñu sa nai, sa devolo sapu sekesekei ni si arini. Asa sa vasina sapu koa ia sa kurukuru kaleana, meke sa poropita kokohana, meke kote koa ta sigiti va kaleana si arini vasina, rane na boñi, meke ninae rane ka rane.

Sa Vinari Pitui Vina Betobeto

¹¹ Meke beto asa si dogoria rau si keke habotuna Bañara lavata sapu keorona, meke dogoria tugo rau si Asa sapu habotuna vasina. Meke govete nia sa mañauru na pepeso si Asa, meke lopu ta dogoro.*

¹² Meke dogori rau saripu matedi, hiteke na lavata, turu dia pa kenuna sa habotuana Bañara. Meke ta tukele sari na buka, meke keke pule si ta tukele sapu sa buka tinoa. Meke ta pitu saripu matedi, koari na tinavete saripu ele taveti rini, gua sapu ta kubere koari na buka.

* **20:8** Izk 7:2; Izk 38:2,9,15 * **20:11** Dan 7:9-10

¹³ Sari doduru tie matedi, meke sarini pu mate pa lamana meke sarini pu koa pa popoa Hedisi sa popoa tadi na tie matedi, si vura beto la meke koa vasina. Meke hopeke ta pitu sari doduru koari na dia tinavete saripu ele taveti rini, leadi na kaleadi.

¹⁴ Sa minate meke sa vasina tadi na tie matedi sapu ta pozae Hedisi, si ta okie la pa korapa kopi nika lerana. Asa tu sa minate vina rua.

¹⁵ Meke sari doduru pu lopu ta kubere pozadi koasa buka tinoa, si ta okie la pa korapa kopi nika lerana.

21

Sa Mañauru Vaqurana meke sa Pepeso Vaqurana

¹ Meke dogoria rau sa Mañauru vaqura meke sa popoa pepeso vaqura. Ura ele beto hokara sa Mañauru kekenu, meke sa popoa pepeso kekenu. Meke loke lamana si koa.*

² Meke dogoria rau sa Vasileana Hope, sapu sa Zerusalem vaqura, sapu korapa gore mae guana koe Tamasa pa Mañauru. Meke tava namanama si asa meke doño lea hola, kekenoño guana barikaleqe sapu tava sari va leleana, pude aqa nia sa nana palabatu pa nana toso varihaba.*

³ Meke avosia rau si keke mamalaini sapu vura mae guana koasa habotuana Bañara, sapu zama va ululae guahe: “Dotu, koa turani Tamasa kamahire sari na tie. Uve, kote koa mo koa rini

* **21:1** Ais 65:17, 66:22; 2 Pit 3:13 * **21:2** Ais 52:1, 61:10; Rev 3:12

si Asa. Arini si kote na tie soti Tanisa, meke Asa tugo si kote na dia Tamasa.*

⁴ Meke kote puha pani Tamasa sari doduru kolomatadia, meke lopu kote mate babe kabo, meke loke dia tinalotana, na tinasigiti sarini. Ura sari doduru vina toṅoto koadi si ele beto hokara,” gua.*

⁵ Meke zama guahe si Asa sapu habotuna koasa habotuana Baṅara: “Dotu, va vaqurai Rau sari doduru tinitona!” Meke zama gua tugo he koa rau si Asa: “Mu kuberi si arini, sina hinokaradi meke ta ronuedi sari na zinama arini.”

⁶ Meke zama pule koa rau si Asa: “Dotu, ele gorevura beto hokara kamahire sari doduru! Arau tugo sa kekenu meke sa mumudi, sa pinodalaena meke sa vinabetona. Meke koa sa sapu memeha, si kote poni moka nia Rau sa kolo napo mae guana koasa bukaha tanisa kolo tinoa.*

⁷ Meke arini pu turu va nabu pa dia rinaṅerane osolae kamoā sa vinabetona, si kote somana vagia sa kolo tinoa. Meke Arau si kote na dia Tamasa, meke arini si kote na tuqu.*

⁸ Ba saripu matamatagutu ni sari na ṅinovaṅovala na minate, saripu va guguedi, sari na tie huporo pu variva kurekuredi dia hahanana, sari na tie variva mate, tie vari riqihi na barabarata, tie vakuvakutaedi, sari na tie pu vahesi beku, meke sari doduru tie kokohadi, si kaqu tava kilasa beto koasa kopi nika lerana,

* **21:3** Izk 37:27; Liv 26:11,12 * **21:4** Ais 25:8; Ais 35:10, 65:19

* **21:6** Ais 55:1 * **21:7** 2 Samuela 7:14; Sam 89:26-27

vasina hurunu sa nai. Asa tugo sa minate vina rua,” gua si Asa.

Sa Zerusalemā Vaqura

⁹ Meke keke ri ka zuapa mateana sapu vaquru hopeke taṅini sari ka zuapa baolo, pu siṅi i ka zuapa oza mumudi, si mae koa rau, meke zama: “Mae, maqu va dogoro nigo sa barikaleqe tanisa Lami,” gua.

¹⁰ Meke turanau sa mateana si rau koasa niniranira tanisa Maqomaqo Hope, meke sage la pa keke toqere nomana sapu ululu hola. Meke va dogoro nau sa sa popoa pa Zerusalemā, sa Vasileana Hopena, sapu korapa gore mae guana koe Tamasa pa Maṅauru.*

¹¹ Meke nedala si asa, sina koa koasa sa tinolava taṅisa Tamasa. Meke sa kalalasana sa vasileana si gua tugo na patu marilaena sapu via guana qelasi.

¹² Meke sa goba pa vari likohaena si moatana meke ululuna, meke ka manege rua sari na sasadana, meke ari ka manege rua sari na mateana pu kopudi ri na sasada, meke ta kubere koari na sasada sari na pozadi ri ka manege rua butubutu Izireli.*

¹³ Meke hopeke neta sasadadi sari ka made kalina: ka neta pa kali gasa rimata, ka neta pa kali lodu rimata, ka neta pa kali gede, meke ka neta pa kali matao.

¹⁴ Meke sa gobana sa vasileana nomana si ta kuri koari ka manege rua patu sinokirae, meke

* **21:10** Izk 40:2 * **21:12** Izk 48:30-35

ta kubere dia koarini sari na pozadi ri ka manege rua apositolo tanisa Lami.

¹⁵ Meke sa mateana pu zama koa rau si tañinia nana pa limana si keke kolu padapadana sapu ta tavetae qolo, pude pada ia sa vasileana nomana, sari na sasadana, meke sari na gobana.*

¹⁶ Meke pada ia sa mateana koasa kolu pada-padana sa vasileana nomana, meke kekenoño puta sa gineledi ri ka made kalina, meke sa ululuna, na labena sa vasileana. Hopeke karua tina made gogoto kilomita* si arini.

¹⁷ Meke pada ia tugo sa mateana sa gobana, meke ka tolonavulu onomo nava sa ululuna. Meke totošo pada ia sa mateana si asa, si tavetia sa sapu kekenoño gua hoke padapada nia ri na tie.

¹⁸ Meke sa gobana si na patu nedala kekenoño guana qelasi viana, ba sa vasileana lavata si ta tavete pa qolo sapu tava viana pa nika, sapu nedala kekenoño guana qelasi viana.*

¹⁹ Meke sari na sinokiraedi rina gobana sa vasileana si tava sarie soku votivotiki patu marilaedi. Sa sinokirae kekenu si na patu nedala guana qelasi viana, meke sapu vina rua si na patu sapu bulu guana lamana peava, sa vina neta si na patu pepolo, meke sa vina made si na patu emerolo*.

* **21:15** Izk 40:3 * **21:16** Sa gelena sa padapadana pa zinama Quriki si “keke tina karua gogoto sitedia”, meke “keke gogoto made navulu made kiubiti” pa vesi 17. Gina sari na naba hire si na vina padapadae sapu hokoto valeana si asa. * **21:18** Ais 54:11-12 * **21:19** Sa patu emerolo si buma guana kara mahi.

²⁰ Meke sa vina lima si na patu gasigasi keoro meke bupara ziṅara, meke sa vina onomo si na patu ziṅara, meke sa vina zuapa si na patu meava, meke sa vina vesu si na patu beriolo*, meke sa vina sia si na patu topazi, meke sa vina manege puta si na patu karaesoparasi, meke sa vina manege eke si na patu sapu bulu guana maṅauru, meke sa vina manege rua si na patu ametiseti.

²¹ Meke sari ka manege rua sasada si hopeke ta tavetae keke vovoto davi nomana. Meke sa ṅati siranana sa vasileana si ta tavetae qolo mo sapu tava via pa nika sapu ṅedala guana qelasi viana.

²² Ba lopu dogoria rau sa Zelepade pa korapa vasileana. Ura sa Baṅara mo, sapu sa Tamasa pu tagoi sari doduru ṅiniranira, meke sa Lami si sa Zelepade tanisa vasileana.

²³ Meke loke rimata na sidara va kalalasia sa vasileana. Ura sa Tamasa si ṅedala pa vari likohaena sa, meke sa Lami si na kalalasa tanisa.*

²⁴ Meke kote ene pa kalalasangana Sa sari na tinoni pa popoa pepeso, meke sari na baṅarana sa popoa pepeso si kote paleke lani sari na dia tinagotago na vina lavata koa Sa.*

²⁵ Meke sari na sasadana sa vasileana si kote tukele doduru rane, meke lopu kote ta tuku, sina loke boṅina sa vasina asa.*

* **21:20** Sa patu beriolo hie si buma guana elo kinu, sa patu topazi si meava guana hakua saganana, sa patu karaesoparasi hie si buma guana hakua makatana, meke sa patu ametiseti hie si pepolo guana vua leqata. * **21:23** Ais 60:19-20 * **21:24** Ais

60:3 * **21:25** Ais 60:11

²⁶ Meke kote paleke nuquru lani rini pa korapa vasileana sari na tinagotago na vina lavatadi rina tinoni tanisa popoa pepeso.

²⁷ Ba lopu kaqu hite nuquru la koasa vasileana sana si keke tinitona bonina, babe na tie pu evania sapu gua variva kurekurena na kokohana. Ba arini mo pu ele ta kubere pozadi koasa buka tinoa tanisa Lami, si kaqu nuquru koasa vasileana sana.*

22

¹ Meke va dogoro nau sa mateana sa ovukuna sa kolo tinoa hola, sapu via valeana, meke totolo vura mae guana koa sa habotuana Baṅara tanisa Tamasa meke sa Lami.*

² Meke totolo gore si asa pa kokorapana sa sirana koasa vasileana. Meke pa karua taqelena sa ovuku si turu nana sa huda tinoa, sapu hoke vua ka manege rua totošo pa vuaheni, keke totošo pa hopeke sidara. Meke hoke ta salana ni rina butubutu tie sari na elona.*

³ Meke loketona hokara lineveleve si kote koa koasa vasileana asa. Sa habotuana Baṅara tanisa Tamasa meke sa Lami si kote koa vasina, meke kote vahesia ri Nana nabulu si Asa.*

⁴ Kote dogoria rini sa isumatana, meke kote ta kubere pa raedi sa Pozana Sa.

⁵ Meke loke boni si kote kamo vasina, ke lopu kote ta hivae koa rini sa kalalasana sa zuke meke sa rimata. Ura sa Baṅara, sa Tamasa mo si na

* **21:27** Ais 52:1; Izk 44:9 * **22:1** Izk 47:1; Zak 14:8 * **22:2**
 Zen 2:9; Izk 47:12 * **22:3** Zak 14:11

dia kalalasa. Meke kote koa baṅara ninae rane ka rane si arini.*

Sa Pinule Mae te Zisu

⁶ Meke zama mae guahe koa rau sa mateana: “Ta ronuedi meke hinokaradi sari na zinama pa buka hie. Sa Baṅara, sa Tamasa pu ponia sa inavoso koari na poropita, si garunia sa Nana mateana, pude vata gilana nia koari Nana nabulu gua sapu lopu sana kaqu ta evaṅa.”

⁷ Meke zama se Zisu: “Dotu, kote lopu sana atu kamo si rau! Tamanae tugo si arini pu va tabei sari na zinama kinorokorotae pa buka hie!” gua.

⁸ Meke arau Zone si avosi na dogori sari doduru pu gua hire. Meke sipu avosi na dogori rau sarini, si kokotuṅu gore si rau pa nenena sa mateana pu ele va dogoro nau si arini pude qu vahesia si asa, gua.

⁹ Ba zama mae koa rau si asa: “Lokari, lopu tavete gua asa! Arau si na nabulu gua mo agoi, meke na nabulu turaṅadi ri na tasimu pa rinaṅeraṅe sapu sari na poropita, meke sari doduru pu va tabei sari na zinama koasa buka hie. Mu vahesia mo sa Tamasa!” gua.

¹⁰ Meke tozi nau sa si rau: “Mu tozi vura ni sari na zinama korokorotae saripu ta kubere koasa buka hie, sina ele tata sa totoṅo sapu kaqu ta evaṅa saripu gua hire.

¹¹ Ke asa sapu tavete va sea si mani tavete va sea latu, meke asa sapu vahesi beku na evaṅi sari na tinavete bonidi, si mani tavete va boni latu, meke asa sapu toṅoto si mani taveti sari

* 22:5 Ais 60:19; Dan 7:18

na tinavete toṅotodi, meke asa sapu madina, si mani koa madi nono latu.”*

¹² Meke zama se Zisu: “Dotu, kote lopu sana atu kamo si Rau. Meke paleki Rau sari na pinia, pude poni sari na tie gua sapu garo koari na dia tinavete.*

¹³ Arau tugo sa kekenu meke sa mumudi, sa pinodalaena meke na vinabetona.*

¹⁴ Tamanae tugo si arini pu ele va via i sari na dia poko doduru, sapu sari na dia tinavete toṅotodi, meke tava malumu pude nuquri sari na sasadana sa vasileana nomana, meke pude henai sari na vuana sa huda tinoa.*

¹⁵ Ba sarini pu lopu tava malumu pude nuquru koasa vasileana nomana, si sari na tie kaleadi, pu vakuvakutae, na vari riqihi, na barabarata, variva mate, vahesiyesi beku, meke sari doduru tie pu qetu holani sari na zinama na tinavete kokohadi.”

¹⁶ Meke zama se Zisu: “Arau Zisu, si garunu atu nia koa gamu sa Qua mateana, pude tozia sa inavoso pa buka hie koari na ekelesia. Arau mo si Asa pu tuti gore mae gvaqu koe Devita, meke Arau tugo sa pinopino habia nedalana,” gua si Asa.*

¹⁷ Sa Maqomaqo Hope meke sa Barikaleqe si zama koe Zisu: “Mu Mae,” gua. * Meke sari doduru pu avosi sari na qua zinama si madi zama: “Mu mae,” gua. Meke gamu doduru pu

* **22:11** Dan 12:10 * **22:12** Ais 40:10, 62:11; Sam 28:4; Zer 17:10

* **22:13** Ais 44:6, 48:12; Rev 1:8,17, 2:8 * **22:14** Zen 2:9, 3:22

* **22:16** Ais 11:1,10 * **22:17** Ais 55:1

memeha, si mi mae. Meke sari doduru pu hiva, si madi napoa sa kolo tinoa sapu ta poni mokana.

Sari na Zinama Vina Betobeto

¹⁸ Arau, Zone, si va balau zonazona gamu si gamu doduru pu avosi sari na zinama korokorotae tanisa buka hie: Be keke tie si hoda lani pule kaiqa toña koarini, si kaqu tomo lani pule Tamasa koasa sari na oza pu ta kuberedi koasa buka hie.*

¹⁹ Meke be keke tie si vagi pani si kaiqa tona koari na zinama korokorotae koasa buka hie, si kaqu vagi pania tugo Tamasa sa nana hinia koasa vuana sa huda tinoa, meke koasa vasileana hopena, saripu ta tozi vurae koasa buka hie.

²⁰ Asa sapu tozi vura ni sari doduru pu gua hire si zama: “Leana, kote lopu sana atu kamo si Rau!” gua. Uve, mani gua tugo. Mae tu, Bañara Zisu!

²¹ Sa tataru lopu ta nana kamona tanisa Bañara Zisu Karisito si mani koa koa gamu doduru tinoni te Tamasa.

* 22:18 Diut 4:2, 12:32

Buka Hope
The Holy Bible in the Roviana language of the
Solomon Islands
Buk Baibel long langguis Roviana long Solomon
Islands

copyright © 2016 Wycliffe Bible Translators, Inc.

Language: Roviana

Translation by: SITAG

This translation is made available to you under the terms of the Creative Commons Attribution-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not make any derivative works that change any of the actual words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2017-11-06

PDF generated using Haiola and XeLaTeX on 18 Apr 2025 from source files dated 13 Dec 2023

2a5324ac-61e8-5e5b-b226-f3d15850d7c5